

Aiboisit Naeseunit Edeke Naka Amaia

Jeffersonville, Indiana, U.S.A

65-0220

1 Kasalakisi kibwoi adaun apak edit kwape kitulurio awokokwes kanuka ailip. Ido kwana, kede akwesiwok itulurитай, amuno eong ebe itauonowok da itulurитай, mam eong ajeni arai imwasi ai kane lolo ekotosi aiitunio kotoma ailip, kanu icebore yen itegelikina? Ikeu akanikon kuju, ido kotema, "Edeke, koinak eong lolo ngun nuamoot eong." Kisirereng Ejakait yes.

2 Papa kosi loka Akuj, kwape kwana kidolokinia isio Eicolongokon Lokapolon loka asianut, ka aiyuun, ilomari isio toma kangun Nuedeparitosi; neabu Edeke, ka Imalaikan, ka Ikerubin, ka ajore kere naka Akuj kotukokinotor nepepe. Naarai abu Ngesi kotema ebe mam epedori ajaun anyiporit adiopet da naedoi kwap komam Papa loka Akuj ejenuni nuikamunitos ngun. Epone bodo loetia ai ejenia ngesi kane ne ejaatar akwat nuka itunga ituluritos akwesikec, ido kojaas anyarit Jo kanu ipudesia luitegelikina. Papa, kongoleu kwap mama ejai akwap naipuda lolo, naarai kirai sio itunga lukipuda.

Ido elipi eong, wu Edeke, ebe kanu naarai itukokin isio ne ka aitodiarit da mamaKon aiyuuni kosi mama ejai Edeke lokajaran Loebongonokini ailip; kilom isio kinga kama ejaas akwapin nuka lumam ekepitai, nuka etau ka aki, alomun kinga ajar ajar naetiakara, ido kanu ajar kotoma alimor aiyuun kosi mama ijai Jo. Lolo ikeunit isio akanin kosi, ido kabalasi, "Ipuda sio." Okwe Edeke, kobongok nginidiopet naka ailipasiakec.

3 Kosodi konyet, wu Papa, ilipi isio ebe ipejoikini Ijo sio lolo kotoma Akirot. Ibunit isio ne kanu aitetenario, kanu ajenun, tetere sio kijenuni epone loka ajar kotoma apaaran kana naejai lolo; nuebeit aidarit koingaren, nuiswama. Naarai, ijeni isio ebe Abunore naka Ejakait eyapie, kwape ejaatar aanyuneta kere nuapotu inaabin kolingata einer. Ijai sio ayapiikin apak ngin, Ejakait, neeinakinere alakunio naileleba mama ejaasi idweKon. Edeke, kisipedo isio, kanginidiopet kasio, ajaun ngina, Papa. Komameun idiopet da yen etwaniari. Ngin nges alosikinet kosi naka ajaut ne, Ejakait. Imina isio Jo, ido ijai sio itamit akapanakin kanu esawa kangol.

Inerakinos ka sio, kilipit bobo sio, akuare na. Ido kitangaleu ledekasi. Luedekasi kere ka luiticanitai luejaas toma aduketait na, ilipi isio ebe itangaleuni jo kes, Ejakait; kanoinei ngul luejaasi ka ipudesia luka Emoyo. Kosodi aisiteteun Agogong ka apedor kotoma naka idweKon luiyuunitos. Kopedoros iboro lu, Papa. Kilipit isio nuipu, naarai ibu Jo kolimokinite isio ailip, "Ingita luipu, kilipata iboro luepolok, luipu kakesi," tetere aiyalama kosi isilosikin. Ido kilipit isio ngun Kokiror loka Yesu Kristo. Amen.

Ipedorete yesi aiboikin.

4 Kotoma abeit erai na arereng naepol lolo, kanu abongun ne toma otut lo bobo, kane kosomero kalo, kanu aitereikin ka itunga lukajokak luejaasi ne kanu aiirar Akiro Nukajokak. Elipi eong aitim naka Edeke aingarakin eong alimokin yes Abeit kwape ejaar neanangit eong ajeni Abeit. Epedori Ngesi arapakin akituk naka etunganan, kwape abu Ngesi korapakina akituk naka engatuny. Ido korai eong atamakini alimun icebore yen ibucara ido kopegasi kede akoteKe, ailipaka nakotau nges ebe ti Nges kegoloki akitutuka, tetere mam eong alimuni ngun. Naarai, kotoma abeit, akoto eong da elopet ajaun toma Akuj; ido timam nepepepe eong ajaun ngina, ido kilema ber ngun kere, ti eong araun engarenon lokaingal, icetunganan yen abu kiswama icebore koipone loka aingal. Arai keswama eong ngun, erai naarai mam eong ajeni ace nuegelara. Kisirereng yes Ejakait.

5 Kwana moi tupuruc, arai erai akote naka Ejakait, alosikinit eong einer kotoma akou naka akirot na ebe *Edukone Ka Elakit*. Ido imuno ebe ipote yesi, ido koyangautu ikalamun kus ka apapulai. Mam oni ibuni ayangar apak naewoj noi, konye akoto bon eong ai...ngin nges alosikineteka naka abongun ne, nasodit, kotoma Indiana, ebe abu eong kesumun yes ngun. Ido abuni eong atamakin moi tupuruc. Arai mam eong adumuni ngin moi tupuruc, adumuni eong moi kuare. Konye alosi eong aitam moi tupuruc. Arai itojok Ejakait, einer kama ejai akou naka akirot kangin, awomisio aarei. Ido kingarak oni Ejakait ajenun ngun nueraas Abeit, bon ajenun abeit, tetere oni kipedori alosit kotoma Abeit ka Aica. Oni...

6 Ijeni jo, ijai kolo isio kede epapero lomojong loeriono. Abu ngesi kotema eong, abu kotema atiar, "Onac Billy," ebala ngesi, "Eong-Eong mam akoto aditionis kocor." Kotema ngesi, "Akoto eong ajaut ka atikitika kotoma akanika. Ido ne ekutakinere epirigi, mam eong akoto ationis adio kanen. Adau eong aingit Edeke apak naewoj kau, arai ejai imodiobore yen erono, akoto eong aitemokin ibore ngin kwapekwana," ebala ebe, "Naarai eraun naemutono ido kopol ekwam kotoma atupuruc kangin ne neenyounio ataker atubor okekwa je." Ebala, "Mam eong akoto aitolitoleta ace kere. Akoto eong aitemokin ngun kere kwana." Ngun nges kijaar oni ne, aitam aitemonokin kere nutikititoloto, tetere oni ipedori alomar toma kosawa kangon.

Kwaba mam eong abuni einer ka yes adaun awojau lolo, naarai kijai kede aijaanakineta aarei moi. Kasodi do eong akeriar nenice bobo, mama ejai ace, aijaanakineta ace bobo.

7 Konye, kwana, kotoma Oitabo loka Ikisila. Akoto eong asioun kotoma osula lo16, ikokoron iuni lusodit, luka Ikisila 16:1 kiton 3.

Kidarenenei elap loka Abib, koricenenei da aleleng naka EJAKAIT Ekonideke:... kolap loka Abib (Lokiwongonet) nges kitolomunia jo EJAKAIT Ekonideke kakwap nako Misiri kuare.

Iinakini lukosipanin luka aituk ka amerekekin araun asubanit naka aleleng naka EJAKAIT Ekonideke, kaibois naeseuni EJAKAIT aisiboikin ekekiror.

8 Kwana akou naka akirotoka lolo erai: "Aiboisit Naeseunit Edeke Naka Amaia.

Arai kimisiik ijo, elap loka A-b-a-d...-b kanen erai, apolouke ebe, "Apuli." Elap loka Apuli nges aponi kitolomunere kes kinga.

Ido kwana ibore yen itegelikina nges ebe oni lolo, kwape ikamaak luka Edeke, kotoma apaaran kana najari oni kotoma, ido kidumuni oni awomisio nuegelegela nuka itunga. Ido bon ebe ejaasi awomisio nuegelegela kanuikamunitos ibore, iburai kojaasi aingiseta nuegelegela; Iburai kojai abongokinet adiopet nakabeit mama ejai nginiingiset kere naingisetai.

Arai ti kingit oni aingiset ebe, "Inyobo yen?"

"Eebo," ti kes ketemasi, "Abao."

"Inyobo aswamuke?" Itei jo?

Kwana, kanen, epedori aticepak icetunganan atemar ebe, "Mam ngin erai abao naiboiere. Erai ngin abao naiwadikao, konye kereka korai abao ngin. Itei jo, Iburai kojai abongokinet nakabeit, kanuka ngin.

9 Ido korai ti eong aingit aingiset naikamunit imodiobore, Iburai kojai abongokinet Nakabeit. Epedori ajaut icebore yen eyapiete ka ngin; konye iburai kojai duc abongokinet nakabeit naitebeikina kanuka nginiingiset. Aso, kanuka ngun, kanginingiset naelomuni kotoma aijarawok, iburai kojai abongokinet nakabeit, naibecokina.

Kosodi kwana, lolo, ipupi oni ebakai ebe, luipu kotunga wok kotoma akwapin lolo...

Kwape araar eong ekiyakia loidila alosit, alosen en eong aiboisio nuipu juwai naka angolol ka anatar akwap kere, kiriamunun eong ka idiinin luipu luegelegela, kwape nat Buddha, ka Mohamedan, ka Sikhs ka Jains ka ice kere, luka idiinin luka akwap. Kosodi konyet kane kotoma United States wok na; ka akwapin ace nukokinga, kiriamunun ka ikanisan wok kere luegelegela, kwape nat ikanisan luka idiinin, ageun ka Roman Catholic nasek, kosodi konyet mama ejaas Iyonanin, ka ngun kere, ka ipucino luka ainapeta luegelegela, kosodi konyet aijesar kwap toma...aturio kere nuka idiinin, nuka idiinin luka Protestant akwatakanyikaongon luegelegela.

Kwana, kanginidiopet kakesi, ejena bo sek, ebe ipedori jo ti aanyun awomisioitikec, ido mam eong apedori aitoron kes. Kanginidiopet kakesi elimorit ebe kes eraasi abeit, ido ejaatar kesi ka abeit. Ido ibusakinit itunga lueraasi lukokanisan kangul aiyuun ngin, naarai etalaikisi kesi iingarenikec, aiboisit naka Ikar Kere naejaasi kesi alosit toma, mama ejai aisisianakin naka ekanisa kangol. Ido itegelikina kesi noi, ediopet kama ejai loce. Aitodol naiswamaunia ngin aingiseta akwatakanyikaongon ka ice nuegelegela.

Kanuka ngun, kwape ejaatar aingiseta akwatakanyikaongon ka ice nuegelegela, iburai kojai Abongokinet adiopet naedolit. Ido akoto eong oni lolo, kwape kitamitor alosit toma Akuj, airiamun ka Ejakait wok Yesu lokimina oni kere, akoto eong aanyanar kotoma Kanuiwadikatai kanu adumun ngin.

10 Kwana, arai erai ngin aingiset naka Ebaibuli, apolouke iburai ngin kojaatar ka abongokinet naka Ebaibuli. Mam ekoto ngin kobu kama ejai atukos naka itunga, kama ejai aibunget naka aima adio mutan, araibonat kama ejai ekesisianakinan edio mutan, araibonat kama ejai ediini edio mutan. Ekoto ngin kolom eitena kotoma Kanuiwadikatai, ne ejai aiboisit naka Edeke naka airiamun, naka aima. Ido kotoma abeit, kwape eraar Edeke, ejai aiboisit naka airiamun nenice, neiriamununotor Ngesi.

Kwana, kijenuni oni kane kotoma Ikisila kane, kotoma ageunet, Musa ejai ainyogoikin einer Naiwadikatai, iboro lualimokinit ngesi kesi, epono loabu Ngesi kitolomunia kes kinga ka akan naepol naegogong, ko Misiri, ido kedaunit ber nasodit aiscat kes.

Anyaritai kes ebe "itunga luka Edeke" aitodol nekelomuniata kesi ko Misiri kangin, kosodete konyet do anyara kes "ekanisa loka Edeke." naarai, ekanisa nges atukot, araibonat, kaitebeikin, apolou naka *ekanisa* nges, "ngul luenyaraunitai kinga," ngul luanyaraun kinga. Ido elomunete kesi kinga ko Misiri, tetere araun ekanisa.

11 Kwana abu Edeke kolimok kes, neapotu kesi... eringa kes kesipokina eyekalu ka ngun kere nuapotu kesi kiswamata, "Abu Eong aseun aiboisit naka aimaKa, ido abuni Eong aibwaikin Ekirorika tomakeng." Ido ngin bon nges aiboisit naekot Edeke airiamunor ka idiotunganan kere, kerai kanuka asekuniKeng Elopet. Abu Ngesi koseu aiboisitiKe. Ido neabu Ngesi koseunia AiboisitiKe, abu Ngesi kibwaik EkiroriKe. Ekokoro lokiareit kane kilimokinit oni ebe; "Abuni Ngesi aibwaikin EkiroriKe toma aiboisit naeseuni Ngesi tetere

itunga aima Nges kotoma." Kwana, ibore kangin ngesi yenita, kikoto oni ejenun neejai aiboisit ngin.

Kede awomisio akwatakanyikaongon ka icebore nuegelegela, korai kereka ebe kinyeinit ber oni ediini kere loka ikapiirin, ido kenerasi nuka ediini loka Ikristayon. Na da, ajaatar eong ka aipup kanuka ikapiirin, arai kemam ti mam eong alosenene ngina kasodi einer nepepe ka kes. Konye, ibucaritos kesi. Ekristayone bon nges ediini loerai lokabeit, erai Ekristayone; naarai, eyuunit eong ngol araut Abeit. Nges bon ediini loedolit.

12 Ajaunar eong mama ejai ailit naijulanakinere abalasi nakwangan akaulo naka ngulusawan iwongon. Ne da, Mohammad, esasedoti lokapolon ka engarenon loabu kobu akaulo naka Kristo, arai loamitai ebe erai enabi, ido mam eong abunonokin kilema ngun nuarai ngesi, cut akaulo naka iinacan luka Maccabee. Konye neapotu kesi...Neatwania ngesi. Alimorit ngesi ebe abuni ngesi ajarun bobo kosodi aikamar akwap kere. Kwana, nepetai akaulo naka ngulusawan iwongon ijulakinio ikedarak ailit, ido idario abalasi nakwangan kailitike. Eswamata kesi ngun kwana adaun ikar ilukumin iarei, komunosi nges ajarun bobo kosodi aikamar akwap. Konye itei jo...

Ido kilot jo neejai Budha; Budha abu kojar ikar akwat nuipu, nepetai ikar elukumit ediopet ka akwataarei-akwatauni kau, edeke loko-loko Japan. Aso arai ngesi ekesisianakinan loka nukacoa, icebore kwa nat bala Confucius, ka luce ngun kere.

Konye nu kere, adaun...ikapeleunak, ka ngun kere, apotu kesi kere apotu kotwakata ka nukacoakec, ido anuki ido ejaas toma ates.

Konye Ekristayone, loesipokinit Yesu Kristo, ejai ailit naeworori. Arai Nges bon Etunganan loabu kobwo kotoma akwap, kosodi ajar ka atemar ebe, "Ajaatar Eong ka apedor aiperikin aijaraKa kwap kasodi alemun bobo." Ido abu Ngesi kiswama ngun. Ido ejari Ngesi lolo.

Ido kijeni oni ebe ejari Ngesi, naarai ejaasi Nges nepepe kaoni ido itigogongorit Elopet kanuka aanyuneta ka nukaumokin da nuetakanete, nuabu Ngesi kisumun ebe alosi Ngesi aswam kanu aitodiar ngin. Kanoinoi kwape Epir loka Akim loabu kingarenik idwe luka Isirael aitor amoding, ejai nepepe kaoni lolo, ka aputoke da inomaritai; iswamai aanyuneta ka nukaumokin nuabu Ngesi kisumun ebe abuni Ngina aswam kotoma apaaran kana. Kanuka ngun, akwapin nuce kere nuka ikapiirin ejaas kinga. erai Ekristayone!

13 Kwana, kwape ajaatar aingiseta akwatakanyikaogon ka icebore kanuikamunitos neiriamununotor Edeke, "Iriamunos Ngesi ka luka Methodist, araibonat iriamunos Ngesi ka luka Baptist, kosodi airiamun kotoma *nu* ka *ngun*, ka nuce *kwa*." Kwana, ejai aingiset nen, kanuka ngun ejai nginitunganan kere amoun aitajarioke kede kamaran ka akuarian.

Konye lolo, akoto eong aitam amoun, kasodi aitigogong kotoma Kanuiwadikatai, neejai aiboisit naibecokina na iriamunotor Edeke kosodi aima nepepe kitunga. Ido, arai erai nges ngin, ngin bon nges aiboisit na ebunio duc Ngesi airiamunor.

14 Kwana, kipou kayangasi asiometeit na naka Ikisila. Erai ngin akirot naka Ayonanin na da ajaatar kede apolou naelal, araibonat, apolouke ebe, "ikisila iarei." Akirot naka Ayonanin naebe, *Deuteronomoy*, apolouke ebe "ikisila iarei luegelegela."

Ido ngin nges ajaatar Edeke, ikisila iarei luegelegela. Ido ediopet kakesi nges ekisil loka atwanare, ido loce je erai ekisil loka Aijar. Ejaatar Edeke ka ikisila iarei. Kanu atupit Nges, ka aima Nges ka aijaanakin Nges, erai Aijar; aigir erai atwanare. Ejaasi ikisila iarei toma naka Edeke.

Kwana, ediopet kokisila kalu ajai ami-...aponi kitijenikinai mama ajaasi akwapin, korongat Sinai. Abu Edeke kijaik ekisil mama ejai Musa nepepe ka Isirael. Mere ebe apedori ekisil aingarakin kes, konye abu ekisil kitodik kes ebe araasi kesi ikadiakanarak. Kiton apak ngin, mam kes kejenete ibore arai aronis, kiton neadumuniata kesi ekisil. Mam ekisil epedori ajaun komamei aitisilaret. Mam ekisil erai ekisil, arai emamei aitisilaret. Aso, kanuka ngun, "abilio naka ekisil nges adiakar, ido eropit loka adiakar nges atwanare." Aso, kanuka ngun, kiton neasubunia Edeke ekisil kanukec, amamei aronis naemarakinitai neajaasi kesi.

Arai emamei ekisil kane loebala ebe mam jo ipedori aiteker emotokakon kosipidi loedeparit amairon akasaarei ngolisawa, ipedori bodo jo aiteker kodeparite esipidi amairon kaisaarei ngolisawa. Konye arai ejai ekisil loebala ebe mam jo ipedori aswam ngun, apolouke ejai ekisil ka aitisilario kanuka ekisil kangon.

15 Kwana, atwanare, ekisil loka atwanare, arai kes aicorakineta nuaponi kijaikinai ko Moru Sinai, naabu kolimok etunganan ebe arai ngesi ekadiakanaran. Ido, kanu amengerikin ekisil loka Edeke, abu ngesi kotwana. Konye kereka emamei aitajario kotoma okisil. E...Kerai bon ngesi epolisit loapedori agolokin jo toma ojeera; amamei ngin ka imodiobore tetere alemunia jo kinga.

Konye do abu Ngesi kijaik ekisil ece, arai ngol ko Moru Kalivari, neaponi kimarakinere aronis mama ejai Yesu Kristo, ido kanen aponi kotacai aitisilario kanuka aronis. Ido mere ka...Komamei ekisil, "konye itajario

yes kanuka asianut," kanuka asianut naka Edeke, kotoma ainerunio sek naka aijen sek naka Edeke ejautenekon.

Kwana kiseseni oni ikisila iarei lu, Ikisila inera nuka ikisila iarei. Ajaasi ikisila iarei. Ediopet arai ekisil loka atwanare, ido loce je arai ekisil loka Aijar.

16 Ajaasi da aitutuketa aarei nuaponi koinakinai itunga. Kiponi oni einer nukec tupuruc.

Adiopet kakesi aponi koinakinai Adam kotoma aigerosit na ebe, "Arai kiswama jo nu ido komam iswamai kwa," konye aponi ekisil ngol kobilai. Adam, Keba apotu kobilata ekisil ngol, kotoma omanikor loka Eden.

Kosodi Edeke asubun aitutuket nakiareit, kosodi ainakin ngin mama ajai Aburaam, ido ekisil ngol amamei aigerosit kotoma. "Mam erai nuiswama jo araibonat nuibuni jo aswam." Ebalu Ngesi ebe, "Adu Eong aswam ngun." Erai ngin asianut. Ekisil ngol loka Aijar. Abu Edeke kiswama ngun kanuka Aburaam ka Aurike naetupanakini, eraas ngul kere Aur naka Aburaam.

Kwape ebalu Ebaibuli ebe, "Itajario Isirael kere, konye mam ngin erai Iyudayan. Kwape abu Paul kotemaria ebe, "Isirael ngin naerai kotoma, araibonat Isirael kinga." "Kinga," kwape kipou keneratar akuare ya, arai idwe luka Isaak, kanuka ajaanar ka aberu. Konye ekisil loka Edeke arai kotoma Kristo, lo da arai Aur naka Ekabakane naka Aburaam, ebe, "kanuka asianut itajario Isirael kere," kere, aitutuket naka Edeke nakiareit. Konye iboro lu kere alingitos aitodiar Kristo.

17 Kwana koany ekokoro lo2. Ekokoro lo2 kane kotoma Ikisila 16, "Komaata kotoma aibois naseunit Eong." Kwana iburai jo aima Edeke, abu Ngesi kotema ebe, "Kotoma aiboisit na adau Eong aseun," mere naabu icetunganan koseu, konye, "naseu eong."

Kwana, arai abu Edeke koseu aiboisit, einakini do ngin oni akotokin ajenun ngun nuabu Ngesi kiner kanuikamunitos aiboisit ngin. Ka neejai aiboisit ngin? Akoto eong adumun aiboisit ngin, naarai, nabeit, akoto eong aima Nges.

Kijai oni kere ne akuare na lolo, kanu aima Nges. Iboie oni kane lolo, kwape luka Methodist, luka Baptist, Atuliki, luka Jehova Witness, luka Christian Science, ka kere, konye oni kere kimoot icebore.

Ikoto oni ejenun Abeit. Ebalu Ebaibuli ebe, "Ijenunete yesi Abeit, ido kilacakini yes Abeit."

Icetunganan, mam jo ipedori ajenun nuijai jo aswam, mam jo ijenuni epone loswamaet ngun kiton neijenunia ijo epone loiswamaet; mam jo ijenuni nukiswama aitodol neijenunia ijo epone loiswamaet ngun, ti gwai. Iburai jo kojoni nuijai jo aswam ka epone loiswamaet ngun.

Itodikini na oni ebe ejaatar Edeke ka aiboisit naka airiamun kanu ikamaakaKe, toma aiboisit ace mutan. Toma aiboisit ngin, bon, nges iriamunotor Edeke ka ikamaakaKe.

18 Kwana, da kereka, aiboisit naseu Ngesi kanu ikamaakaKe, abala Ngesi ebe abuni Ngesi aibwaikin EkiroriKe. Kwana, kaanyanasi kasodete amoun, kotoma kanuiwadikatai, neejai aiboisit na. Nabeit, arai abu Edeke kobala ebe alosi Ngesi aibwaikin EkiroriKe toma aiboisit na alosi Ngesi airiamunor ka itungaKe kosodi aima nepepe ka kes...araibonat kes aima Nges, ejai ngin nenice kotoma Obaibuli, naarai arai ngin kanuka aturio kere.

Ido Edeke Lokapolon lomam ijulanakin mam epedori aijulakin. Ijulanakin etunganan. Konye ipedori jo aibwaikin aijarakon mama ejai idiobore kere yenabu Edeke kolimununite kapak ace, naarai erai ngin Abeit. Erai Abeit. Naarai, ngin bon ibore yenapedori eong aibwaikin amunoka toma, nges Ebaibuli. Naarai, akirot naka etunganan ekurwori, konye erai Edeke loikiara kakere.

Ekaru lo ibusakinit eong ti ajenun nuipu adepar nuabu eong kajeni okaru je. Ijo da ibusakinit, nginipaaran. Irai oni luejai eikoru loka aijen, kanuka ngun kiyatanakini oni adumunun aijen.

Konye Edeke erai loemamei eikoru. Ido, kwape keraar Nges loemamei eikor loka aijen, mam Nges epedori adumun aijen ace. Erai Ngesi loitegoro, kanu ber ageun kede. Kanginiseunet ejai araut naedolit becebec.

Ido epone loabu Edeke kiswama kapak adiopet, ejai Nges aswam kwangin, araibonat arai abu Ngesi kiswama erono neabu Ngesi kiswama kapak nasodit. Arai ebunitor etunganan mama ejai Edeke kanu aitajario, kotoma kanu ebe abu Ngesi kocam nges, iburai nges acamunio kanuka ngun kanginipak. Erai ngin abeit. Arai ebunitor etunganan mama ejai Edeke kanu aitangaleunio, kosodi Edeke acamun nges kanuka ace, etunganan loetupakini abunore, ejai Nges acamun ngol koipone kangopekangol, araimam abu do Ngesi kiswama erono neabu Ngesi kocamunia etunganan losodit. Abu Edeke kiswama epone loalasia ngesi acamun etunganan kotoma. Abu Ngesi kosub epone nuka ngun nuiswamai Ngesi, epone lo ti iswama Ngesi, epone loiswama Ngesi ngun, ido arai ngin kotoma aokot nuka asubanit nuka imerekek komanikor loka Eden. Mam cut Edeke, emamei apak, iiritor aijulakin ngun.

19 Abu Ngesi koseu epone loabunio Ngesi aitajar etunganan. Kitamenen lolo oni aisisianakin etunganan alomar toma naka ngin; kitamenen oni aitiosom kes, kitamenen aisisianakin kes, kitamenen aitarau kes lukidiinin, kitamenen aswam iponesio lu kere luka iboro; ayangaun kes toma, aitamaran kes, aibatisa kes kotoma, epone edio kere loejai, ayangaun kes toma ketosomaete ibaluwan. Konye esalakini, kwapekwangin, iriamunos Edeke ka etunganan kokwap naka Aokot nuka Imerekek nuaponi kobukoroi. Araasi Aokot epone loka Edeke kotoma ageunet, ido eraasi Aokot epone loka Edeke lolo. Erai naejok aswam pentesia ka iboro lu kere, konye ebuni bon aitajario kotoma Aokot. Aokot bon nges epone loabu Edeke koseu aitajaria etunganan, ido mam Nges epedori aijulakin ngun.

Ajaatar Yob da kaibore ngipengin. Ajeni ngesi ebe arai ngesi loadolit, naarai ainakin ngesi-asubanit naepuda Edeke ngesi ainakin.

20 Kwana, kamoata ber oni kwana aanyun ibore erai aiboisit na, ka aiboisit naabu Ngesi kibwaik EkiroriKe. Ibusakinit kwana oni ajenun aibo ber abu Ngesi kibwaik EkiroriKe. Kanen do, kijenu oni ibore erai Ekiror loka Edeke ka neabu Ngesi kibwaik Ekiror ngol, apolouke kidum do oni aiboisit naka aima atipet nape kidumunia oni ngun.

Iboro lu kere, ejena bo ajena, keraasi lu itoribei luka iboro luaponitos. Ekisil kere arai loalingit aitodiarit sek iboro luaponitos.

Cut kwape, eraar elap etoribe loka akolong. Ijaanakini ngesi naemameor akolong, kwape ebeitor Ekanisa aijanakin naemameor O-k-o-k-u loka Edeke. naemameor Okoku, Aica naitidisiara, Ekanisa, ikeyuunak, ijaanakinete Edeke kosodete ainakin Aica naemameor Okoku. Konye naelomunia akolong, mam bobo jo iseseni elap, naarai ejesar elap kwap. Mam Ngin bobo ipuda aicake, naarai edumakini ngesi aicake aloreun kama ejai akolong. Kwana, bala ekiliokit kede aberu, nges erai akolong ka elap, Ekanisa ka Kristo.

Kwana kidumuni oni, ebe, iboro lu eraasi etoribet loka Kristo. Nginisubanit kere, epucit, ka nginibore kere kotoma Aitutuket Namojong, alingit aitodiar Kristo kotoribe; kwape itorio etoribe kwap nen. Kwana ne nges kilosio oni adumun aiboisit nakabeit naka aima, erai abongor ne toma Aitutuket Namojong neaponi koinakinere kasodete aanyun ibore yenikeraasi iboro lu.

21 Kwana, neitorio etoribe kwap nen, ipedori jo ajenun arai erai akiliokit, aberu, arai etiang, araibonat kere yen aticepak erai ibore ngin, naarai ibwaikini etoribe kwap. Ido kwape inyikokinia etoribe ngol aurianar, kwape eraar etoribe enegative; ido mam epedori enegative ajaun kokamei ibore ilopet. Kanukangun, naepikinia ibore ilopet neejai enegative, ilikor do enegative araun ibore ilopet. Etoribe ka e-ka enegative imorikikinos nepepe, ido ngun kes einakinete nges eraun ibore ilopet.

Ido arai, "iboro kere lumojong," abala Ebaibuli, "kotoma Aitutuket Namojong, araasi itoribei luka iboro luaponitos," aso do kanuka ngun, arai Kristo etoribe loka iboro luaponito.

Aso kipedori oni aanyun, kanuka aitupuseta nuka Aitutuket Namojong, neabu Ngesi koseu aibwaikin EkiroriKe, ido ka...kanuka kwana. Kwana, kwape ejaar etoribe, atubor kanen kokwap, abu eong katema, erai enegative, kwape eraar aitupuset. Aso oni, ikamaak, kipedori oni da aanyun itorubei luka Aitutuket Namojong ejaasi amiriaaar alomar mama ejai ibore ilopet yenika Nakitetet.

Kwana, ipucino kere, apaarasia kere nuka aiyeng, eyekalu kere, akito kere, nginibore kere kotoma owema, nginibore kere etupusit Kristo. Ainakineta kere, ikisila kere, nginibore kere ajai toma aitupuset naka Kristo. Kidau lem oni aitor toma kangun, irwan nuipu noi, kane kokanisa.

Apolouke kianyuni do oni, kanuka lu, ebe nginiyuunet, ekanisa, ka ediini ejalakinitai kokau kaneelwana. Mam da ber ejai toma olagano, nepecep da. Nginiyuunet, ngolikanisa, ngolidiini, ejalakinitai cut kokinga. Emamei cut aiboisit kanukec nepe tai da.

22 Ememei imodiobore itupusitai kotoma Aitutuket Namojong, araibonat amodioboisit kere kotoma Obaibuli, naka ekanisa, kilema aimorikikin na abunikinitai naka aduketait naeoj nako Babel. Ngin bon nges ibore yen itupusit aimorikikina. Naarai, arai kanuka Nimrod, etunganan lokaronon loabu kolot kosodi abuikin akwapisinei kere abunore toma aiboisit adiopet ka aduketait naepol naewoj na. Arai ngin aima naka ediini, ejena bo ngin sek, konye komam ecamunitai kotoma Akivot naka Edeke. Aso nen nges iwanyunia ijo ediini loka erionget itupusitai, aduketait naojan nako Babel, kotoma Aitutuket Namojong. Na da, kerai ediini lo cuticut ediini, konye mere ediini loka Akivot naka Edeke.

Mam Edeke esekunit aibwaikin ekisiliKe toma odiini edio kere. Akoto eong Naiwadikatai Obaibuli kanuka ngin, arai ejai. Ajeni eong ebe elimoritos kesi ebe ibwaikinit Edeke EkiroriKe toma odiini, konye mam Nges ibwaikinit. Mam Nges epedori aibwaikin EkiroriKe toma aiboisio nuipu, naarai abala Ngesi ebe abu Ngesi kibwaik EkiroriKe toma aiboisit adiopet. Ido, aiboisit adiopet ngin, kangolidiopet kotoma odiinin wok ekotosi atemar ebe kesi kes eraasi aiboisit ngin, konye mam erai.

Konye aibo ber abu Ngesi kibwaik EkiroriKe?

23 Kwana, ido, Ngesi, ingaibo EkiroriKe, nasodit ber? Ejaun ber oni (Ekiror) ajenun ingai erai Ekiror loka Edeke eringa oni kepero adumun ebe inyobo ngin ejai Ngesi aibwaikin toma aiboisit.

Kwana, idumuni oni ebe ajaatar Ngesi ka imaeta luipu noi. Enyaritai Nges...Aponi konyarai Nges "Papa," lo da erai emaet. Ido aponi konyarai Nges "Okoku," lo da erai emaet. Aponi konyarai Nges "Emoyo Lokalaunan," lo da erai emaet. Aponi konyarai Nges "Aturot naka Sharon," lo da erai emaet. "Apecelut naka aditot," emaet, "Aicerit naka Atupuruc." "Yawe-yire, Yawe-rapa," ikiroria ikanyikaarei luimorikikina kotoma alakunio, ido kes kere araasi imaeta. Emamei edio kakesi kere lokera Ekiror.

Konye ejaatar Ngesi ka Ekiror.

Ne eriamunor Ngesi ka Musa, amamei ber Nges Ekiror, kosodi Ngesi alimokin Musa ebe, "ARAI EONG AJAI NGOL." Ido neiwanyunia oni Yesu kotoma akwap, inera kotoma Iburanian esula lo6...kitimoto, Yokana esula lo6. Abu Ngesi kotema ebe, "ARAI EONG AJAI NGOL."

Apotu kesi kotemasi, "Kanukinyo, irai jo etunganan lomam ber idolit ikar akaisakany da luka apolou, ido ibala jo ebe 'ianyunit Ijo Aburaam'?"

Abu Ngesi kotema ebe, "Eringa Aburaam kejauna, AJAI EONG." Ido arai "EONG" nges Loajai toma okiot loanoki kolo kapaarasia nuka Musa, ngol Loerai "ARAI EONG AJAI NGOL."

24 Ido kereka kwana idumuni oni ebe abu Yesu kotema, da, "Abuni Eong Kokiror loka PapaKa, ido mam yes aipotu kijautu Eong." Apolouke bodo, Ekiror loka Papa iburai korai Yesu. Erai ngin naabeit. Ekiror loka Papa erai Yesu, naarai abala Yesu kwangin. "Adakit Eong Ekiror loka PapaKa. Abunit Eong Kokiror loka PapaKa, ido mam yes ipotu kijautu Eong." Apolouke, kerai Ekirorike Yesu.

Ido abu Gabriel konyara Nges Yesu, apotu inabin konyarata Nges Yesu, ido kotoma abeit cut arai Ngesi Yesu. Eringa aurioKe, kiton enabi lokalaunan abu konyara Nges ebe *Emmanuel*, lo da erai, "Edeke ejaasi kaoni." Apolouke, "Abu Edeke kitodiar kotoma akuan, tetere elemari arokisio nuka akwapin," ido, kotoma aswam kwangin, aponi koinakinai Nges Ekiror loebe Yesu. Aso, Yesu nges Ekiror.

Ido aponi kibwaikinai Ekiror toma naka Etunganan; mere ekanisa, mere ediini, mere aiyuunet, konye Etunganan! Abu Ngesi koseu aibwaikin EkiroriKe toma naka Kristo. Kwana kianyuni oni do ebe eraun Ngesi aiboisit naka aima naka Edeke, neimaia jo Ngesi.

Sek eringa ber Nges keurunia da, kenyaritai EkiroriKe Yesu. Arai ngin naapol ajokis noi, abu Emalaika Gabriel kijaik Ekiror ngol mama ejai totoKe, ebe alosio anyara EkiroriKe "Yesu, Okoku loka Edeke," lo da arai Ngesi.

25 Kanen kijaar do oni ka ngol. Nges lo, bon. Erai ngol, kanuKeng bon, aiboisit naeseunit Edeke naka amaia. Aibosit naka Edeke, eseunitai. Abu Edeke koseu airiamun ka etunganan; mam arai toma okanisa, mere toma odiini, mere toma aiyuunet, konye toma Kristo. Ngin bon nges aiboisit nairiamunotor Edeke ka etunganan, kosodi ngesi apedor aima Edeke, erai toma Kristo. Ngin bon nges aiboisit. Mam ace arai irai jo loka Methodist, Baptist, Etulikit, Protestant, kere lo aticepak irai jo, ejai aiboisit adiopet bon naipedoria jo aima Edeke kotenan, erai ngin toma Kristo.

Iromayon 8:1, ebalala ebe, "Ememei kwana atubokinio mama ejaas ngul luejaasi toma Kristo Yesu, lumam elosete atupar akuan, konye etuparete Emoyo." Erai ngun Akiro Nukajokak.

26 Ipedori oni agelegeleun kotoma aiyuuneta. Ipedori oni egelegeleun kotoma kanuka nuinerai ener bon nesubunit etunganan. Ipedori jo alosit toma okanisa loka Methodist, iburai jo araut loka Methodist; Baptist, loka Baptist; Atuliki, Etulikit. Konye irwan atipet neibatisaikinere jo toma Kristo, iraun do jo atutubet naka AkuanaKe, emamete atiaktiakaeta. Ebilibilario arwatatin nukokiding nuetiaktiakaete kosodi jo alacakin, naarai ijai jo toma Kristo Yesu. Ido imai do jo Edeke kOmoyo ka Abeit neijaar jo toma Kristo Yesu. Erai aitemonokinet naka Edeke ijo aima Nges kotoma Kristo Yesu.

Kwana, emamei ediini loka ekanisa edio kere epedori alimun nu kwape nukeng, emamei yen epedori alimun ngun kwape nukeng. Epone ali ikanga jo alimor ngun ebe eraas nukon? Aswam ibore yen ikoni nen eraun ngin emoyo lokasurup loka Kristo, koraun do yen ilemanari kama ejai Kristo; kolemunun kamaKe. Mam jo ipedori aswam ngun. Kristo bon nges aiboisit nairiamunotor Edeke ka ngul luemaete.

27 Ebalasi kesi, lolo. Kijaunor eong kitunga elimokinete eong. Abu etunganan konyara eong apak edit kau, ko Beaumont, Texas. Abala ngesi, "Ejkt. Branham, arai emamei ekirorikon koitabo loka okanisa kosi, mam jo ipedori alosit toma Akuj." Ijo ipedori tope aiir aoomoom nuka ngun? Siri kiyuu ibore kwanat kangin kwangin. Eomitos kesi ebe ekoto jo korai loka okanisa ece arai mam mam jo iloso toma Akuj. Erai ngin naibucara. Aiyuun ngun, erai aitusurup Kristo. Alimuni eong nu: arai iyuunit ijo emoyo loikoni nen, iwoliorit jo. Erai ngin aanyunet naejok naitodiarit ebe iwoliorit jo, naarai ejai ngin ayangar jo awai kama ejaasi ngun nuabu Edeke kismama. Mam Edeke abu kibwaik EkiroriKe toma okanisa edio kere. Abu Ngesi kibwaik EkiroriKe toma OkokuKe, Yesu Kristo, nearaunor Ngesi ka OkokuKe Idiopet. Ngin nges aiboisit nakabeit

naka aima. Emamete bobo apeteta ace nuaponi kopesikinai, emamei bobo atiida ace.

Mama ejai Kristo, Atiida nailerit, nges abwoia eong;

Aiboisio nuce kere eraas asingei nuelumonorete.

Egiamikinos idiinin kosodete aibiror, etuboros akwapin, konye Nges esalakini ikaru kere. Emamei bobo aiboisit ace naepedori etunganan adumun, kanu amaia Edeke, naebongokinio Edeke ngesi, emamei aiboisit kilema toma naka Kristo Yesu. ngin bon nges aiboisit, aiboisit bon naabu Edeke koseu aibwaikin EkiroriKe, ido aiboisit bon nairiamunotor Ngesi ka etunganan, kanu aima. Iwolorit jo, kanu aiyuun icebore yen egelara.

28 Koany, ipucino kere luka Iyudayan aponi kidarai kotoma aiboisit adiopet. Mam idaritere epucit ediopet kane kanuka luka Methodist, ido ediopet lailo kanuka luka Baptist, ediopet laiye kanuka luka Presbyterian, ido ediopet kau ngina kanuka luka Atuliki, ka ediopet kanuka Protestant. Ipucino ikanyikaarei kere edaritari kotoma aiboisit adiopet.

Erai aitupuset naelai kane. Oni adaun aitor toma Aturio Akanyikaarei nuka Ekanisa napena, alosit aitodiar ebe abu Edeke kidar Aturio kere nuka Ekanisa kotoma Akirot, kanu naarai kanginitur naka Ekanisa abu kitolom atutubet naka Akirot, ido ne etolomuniata kesi ngin kosodete kesi aanyun Aica.

Bala itunga lusek ageete angicun aibatisao Kokiror loka Yesu Kristo. Inyobo apotu kesi kiswamata? Apotu kesi kiswamautu ediini kama ejai ngin, kotwani ngin kanepekanen. Konyouni Edeke alomar mama ejai icetunganan bobo. Mam Nges ebuni asalakin kaaiyuununeta numam eraasi AkirotoKe ka aisisianakineta nuka apaar. Amamei nuapedori Ngesi aswam ka ngin. Emamei ibore yen epaarit kanuikamunitos Edeke. Erai Akirot naka Edeke naelaunit. Kristo nges aiboisit nakokiding naka Edeke naka aima. Erai Ngesi Edeke.

Ipucino ikanyikaarei kere ibusakinit aidario kotoma aiboisit adiopet. Mam jo ipedori aidar epucit kotoma aiboisit ace naegelara. Konye ikanyikaarei ngun... ipucino ikanyikaarei luka ekaru ejai aidario kotoma aiboisit adiopet. Kanuka ngun, ajai Aturio akanyikaarei nuka Ekanisa alomun kotoma aiboisit adiopet, arai Kristo Nges ngon inera kotoma Aturio Akanyikaarei nuka Ekanisa. Erai ngin abeit cut. Aitupuset, naka Aturio Akanyikaarei nuka Ekanisa, konye aponi kosubunai idiinin kama ejai ngin.

29 Kwana kaanyutu ber oni aitupuset ace bobo kwape kijaar ne, erai ngin, aitupuset naka aleleng, abu koling aitodiar Yesu Kristo koipone loka etoribe. Kianyuni oni kane asubanit naka aokot, kanuka atwanare. Asubanit naka aokot nges arai aiboisit naabu koling aitodiar Kristo. Epedori tope ediini aiwi; ido ipedori jo awomoom nuka ekanisa aiwi, ediini ewi? Nabeit cut mam. Ayangaikini aokot, awiun kama ejai aijar. Ido, aijar, kane kotakanuni Yesu kanuka imerekek. Imerekek arai aitupuset naka Kristo, ido alingit aitodiar Kristo koipone loka etoribe, naarai arai Ngesi "Imerekek yenika Edeke," yenabu Yokana kitodia ebe, "yenelemanari arokisio nuka akwapin." Kiwanyuni kwana oni Yesu etakanuni, kane kotoma Anyoun esula lo12.

Koany, arai ngin bon nges aiboisit na mam atwanare apedori ainom. Ne ayapia atwanare ainom akwap, ajai aiboisit ace ajaut; kere luajaasi kwap kana apotu kotwaka. Aiboisit adiopet bon! Kwana, mam ngin erai ebe arai etogo ediopet bon; konye ajai aiboisit adiopet, nen nges neaponi koarere imerekek. Neajaasi aokot nuka imerekek, mam emalaika loka atwanare apedori ainom, naarai arai ngin aiboisit adiopet naebwaikinit Edeke EkiroriKe, ido aponi imerekek ngin komaikinai kolimoroi kageunet, imerekek. Koany, arai ngin aiboisit adiopet na mam nges apedori ainom.

30 Ido kwana ikoni nepenen lolo. Ejai aiboisit adiopet bon namam atwanare nakomoyo epedori ainom, ngin nges Akirot. Mam atwanare epedori ainom Akirot, naarai erai Ngin Akirot nakajaran naka Edeke.

Konye neibwaikina jo aiyuuneta numam eraas Akirot naka Edeke nepepe ka Ngin, ebwosi Akirot awai alopet. Etiakar kwa etiakaror akinyet kakipi. Mam jo ipedori ainyalakin kes nepepe. Kanuka ngun, itei jo, ne elomunia aiyuunet namam erai Akirot naka Edeke toma odiini, elosete kesi kere atupar aiyuunet ngin; kotwani Akirot, kinyikokini ka icetunganan kosodi aiyatakin Ngin apoloor. Kodumuni agogong, kwape elosio Ngesi ageun kama ejai aitojokio, aitalaunio, aibatisao naka Emoyo Lokalaunan, ido kanen kolomari toma Ookat! Iseseni jo erot lokitorit Edeke? Euta ayangaun EkiroriKe, apak kere, aijesun kwap koipone kangopekangol, naarai erai Ngesi Akirot.

Koany, mam Ngin epedori atwanare. Mam Akirot naka Aijar epedori atwanare.

Koany epone loedolitor, kwana. Mam aponi kimikai emalaika loka atwanare ainom itunga lukacoa luko Misiri. Mam emikitai nges ainom aiboisio nuayongitai, aduketa nutiok, lukaparaokec. Araibonat isasedotin luka akwap, mam emikitai emalaika ainom. Apedori emalaika ainom aduketait adio kere, aiboisit adio kere, idiotunganan kere, konye mam nges apedori ainom neajai Imerekek.

Mam atwanare epedori adoikin ne ejai aiboisit naeseunit Edeke, ido erai ngin toma naka Imerekek.

31 Koany, mam da ber ebe arai...ngesi emikitai aisen Isirael araibonat isasedotinique luaraasi Iburanian, ido, araibonat edio kodiinikec. Kere kibusakinit ajaut toma aiboisit naeseunitai, naejaikinit Edeke, araimam ajai atwanare aisen.

Ekanisa, kere loirai jo, neijai jo toma, emamei atiaketait. Konye, ejai ibore idiopet bon yen ibusakinit jo aijen, eyangaikini jo ajaut toma naka Kristo arai mam itwanit ijo. Mam jo ipedori aijar kokingaKe. Epedori aticepak ekanisakon korai loejok, kwape aduketait; eidicanekon epedori araut loejok, kwape etunganan. Konye naingerio jo Akuan, Akirot naka Yesu Kristo, itwana jo edakika loiswama jo ngun. Erai ngin aiboisit naeseunit Edeke naka aima. Nen nges ejai EkiroriKe, cut. Nen nges abu Ngesi koseu aibwaikin EkiroriKe; mere toma naka ekanisa, konye toma Okoku, Yesu Kristo.

Koany, aperi ayuara bon kotoma aiboisit naka aseuniKe, toma OmerekekeKe, ido toma okiror loka imerekek.

Koany, arai imerekek "yenikiliokit" ikiliokit, mere iberu. Mere akelesia, aberu; konye EkiroriKe, mere ekiror loka aberu. Neabeit Nges airiamunor ka itunga mama kerai okiror loka ngin, konye toma OkiroriKe, Nges, Imerekek!

32 Kwana kibala oni, "Ekanisa, ekanisa Lokapolon, loeumokina, abu kiswama *nuido* abu kiswama *kwa*. Etor ngin okwamin luelangir. Kiyatakin sio kaipues. Kipu sio kotoma onaabai. Irai sio ekanisa lokagogong. Erai ngin ibore yenepol."

Konye mam Edeke elimunitor imodiobore kanuikamunitos aberu. Abu Ngesi kotema ebe, "Ngol." "Ngesi," nges erai aiboisit naka airiamun, Imerekek, mere ekanisa. Mere ekiror loka ngin, konye ekiroriKe. Mam Nges abu kibwaik ekiror loka Ngin aiboisit adio kere. Abu Ngesi kibwaik EkiroriKe toma naka "Ngol!"

Ngin nges einakinit ebe, "Kere nuibusakinit oni aswam, kotoma akirot arai aswamisiolit, Iburai oni aswam ngun kere Kokiror loka Yesu Kristo. Arai kilipi oni imodiobore, ejai oni ailip Kokiror loka Yesu Kristo. Arai kinera oni, kinera oni Kokiror loka Yesu Kristo. Arai kibatisai oni, kibatisai oni Kokiror loka Yesu Kristo. Naarai, "Kere nuiswamai oni kakirok ka aswam, kiswamai ngun Kokiror loka Yesu Kristo."

33 Abu etunganan kolimok eong apak adiopet, kijai einer ngun, abu ngesi kotema, "Onac Branham, akaberu, mam eong..." abu ngesi kotema ebe, "Ngin, erai ekirorike *Mutan-ka-mutan*." Erai ngesi ekejaanakinan, aticepak iboie ngesi kane kwana. Ido abu ngesi kotema ebe, "Aberuka," ebala, "ejaatar ngin kekakiror." Atemari bon eong ebe *Jones*, naarai mam arai Jones. Abu Ngesi kotema, "Kwana, mam eyangaikini ngin anyounun kanginitupuruc sek, kosodi alemun ajanit ngin ka atemar da ebe, "Kwana apiei eong alaro na kokiror loka Jones, elosi eong asanin kokiror loka Jones, ido elosi eong igoen kokiror loka Jones." Abu ngesi kotema ebe, "Mam eong awomit ebe ebeit jo anyara ekiror edio kere nepecep da."

Abu eong katema ebe, "Eyuunit eong ebe mam eyangaikini jo aswam ngun." Erai nginabeit.

Ido abu ngesi kotema, "Eebo, kanukinyo? Aso mam eyangaikini ngin alimunun ekiror ngol. Iswamai ngin nginibore kere kokiror loka Jones, kanu ber ageun kede."

Abu eong katema ebe, "Konye mam jo ibu kolot orot kosodi adumun ngin, kosodi atemar ebe, 'Otukui, Jones.' Ajai ngin araun, nasodit ber, kanuka epucit, epucit loka edukone, 'Jones.' Karai mam, ijari jo kotoma adoteu. Ido arai kibatisatai jo kotoma okiror ece kilema Kokiror loka Yesu Kristo, erai aibatisao naka adoteu, na da emamei kotoma Obaibuli."

34 Ejaasi angor nukajokak noi nuipe lolo toma togo lo, nuajokak, nuerimaaka; konye ejai aberu adiopet naerai Ajkt. William Branham. Erai ngin nges elosi ore nepepe keong. Erai ngin nges erai aberuka.

Ejaasi itunga lukajokak toma akwap, ikanisan luibusiak; konye ejai amucaalat adiopet naka Yesu Kristo, ido Ngin nges ebuni Ngesi aomun. Nen nges eperio EkiroriKe. Nen nges ejai aimaKe, toma Kangin ido Ngin bon. Erai ngin abeit. Oo, eebo, ipa. kidumuni oni ebe erai ngin abeit.

Kwana, nges einakinit, oni, "kere nuiswamai oni kotoma oiner ka aswam, kiswamai oni Kokiror loka Yesu Kristo."

Emamei bobo Ekiror ece loeinakinitai kokwap naka Akuj kanuka aitajario, kilema Ekiror loka Yesu Kristo." Aswamisio, esula lo2, ebala ebe, "Kojenun mama ijaas yesi ebe..." emamei bobo ekiror ece loeinakinitai kokwap naka Akuj loibusakinitor etunganan aitajario, bon kotoma Okiror loka Yesu Kristo." Amen. Amuno iwanyutu yesi ngin. Ekiror loka Yesu Kristo, kangin...

Akuj naikiyara nges abu komaik Nges, "Ekale kere lokotoma Akuj emaikinitai Yesu," ebala Ebaibuli ebe, "ido ekale kere loka akwap emaikinitai Yesu." Aso erai ngol Ekiror loeseunit Edeke ka ne ibwaikini Ngesi Ekiror ngol. Ngin nges aiboisitiKe naka aima, erai toma naka Yesu Kristo.

35 Kwana, kijeni oni ebe eraasi ngun kwangin, emamei bobo aiboisit ace kanu amaia kilema tomaKe.

"Ememei Ekiror ece kokwap naka Akuj loeinakinaita itunga, loibusakinitor kes adumun aitajario." Erai Ngesi Ekiror loka Edeke loka alakunio, ejaatar Edeke ka Ekiror loenyaritai ebe Yawe-yire, Yawe-rapa. Yawe-yire, "Isonie Ejakait adikanaretakon kere." *Yehova-rapa*, "Itangaleuni Ejakait adekasineikon kere." Ajaatar Ngesi ka imaeta luipu. Konye ejaatar Ngesi ka Ekiror ediopet loka alakunio, erai ngol loka itunga, ido erai ngol Ekiror loka "Yesu." Ngol nges EkiroriKe, abu Ngesi koseu aibwaikin. Aibo abu Ngesi kibwaik Ekiror ngol? Abu Ngesi kibwaik toma Kristo.

Ikiroria kere luka ikanisan ice, aiyuuneta, imaeta, erai atwanare amunokin kes. Kimunokina jo ekanisa loka Methodist kanu ayangar jo toma Akuj, iwoliorit jo. Arai imunokina jo ekanisa loka Pentekosit, ekanisa loka Pentekosit ayangar jo toma Akuj, iwoliorit jo. Ka ekanisa loka Baptist, Lutheran, Presbyterian, Atuliki, ekanisa edio kere; kijai jo amunokina ekirorikec, araibonat emaetaitikec, araibonat aiyuunetekec, iwoliorit jo.

36 Naarai, mam ber jo ipedori aima da aitodol neibunio ijo toma aiboisit naka aima. Amen. Ngin bon nges aiboisit nairiamunotor Edeke ka ikamaan, erai aiboisit naabu Ngesi koseu kanu aibwaikin EkiroriKe. Nuce kere, kimunokin jo kes, itwani jo. Abu bobo Ngesi...

Etoribe ece loka Yesu kane, adaunit eong aigirakin, Naiwadikatai. Bobo da, abu Ngesi koling atakanun kotoma otoribe kane, "Ibusakinit Nges korai loemamei aitoronet." Aiboisit naibwaikini Ngesi EkiroriKe, mam ekoto imerekek kojaatar ka aitoronet.

Kwana, anibo eiswamae loka ediini ipedori jo aibwaikin mama ejai na; ekanisa bo ali, Atulik, Protestant, Iyudayan, kere loerai ngesi? Eswamae bo ali, ediini ali bo, ipedori jo aibwaikin ngin mamake, "Komamei aitoronet kamake"? kere engeritai, ido mam ekotoi!

Konye ejai aiboisit! Aleluya! Aiboisit ngin ejai toma naka Yesu Kristo. Emamei aitoronet kamaKe. Emamei aronis kotomaKe.

Mam jo ipedori aibwaikin na. Itunga lu kere luetamete aswam ngun, ebalasi ebe emamei ekanisakec aitoronet ka nu kere. Erai loimodokok, ikabilibilak-Akirot, lueminaaka, nepetai luetwakito, Laodikia, aiyuunet, konye mam ngin erai Abeit. Konye karaida Pilato elopet, lokasurupiKe abu kotema ebe, "Mam eong aanyunit aitoronet kama ejai Etunganan lo." lokasurupiKe da abu kitijena ebe amamei aitoronet kotomaKe. Mam jo ipedori aibwaikin aronis adio mamaKe.

37 Abu Ngesi kotema mama ajaasi isasedotin luka apaaraniKe, "Ingaibo kayesi epedori aitoron Eong kanu aronis? Ingaibo epedori aitodikin Eong ebe arai eong ekadiakanaran?"

Kolimok eong emodiokanisa loepedori atemar ebe mam kes kiswamatotor imodiobore yenaronon. Kaitebeikin, emamei ediopet da kakesi, nepetai, kilema ngul bon lu aarata ka aswam nginibore kere yen ejai toma akalenda kanu aismamao, nepetai. Ido koringa enyaraikina ikulepek bonik ebe...Aso mam ngin erai aiboisit naka Edeke nakairiamun naka aima, kotoma aiyuunet adio kere araibonat odiini.

Ipaperoka, mam eong akoto aituguikin itunganan, konye ikamunitos eong nuka Aisiiraret, ido Aisiiraret ngin nges, "Kolomutu kinga kama ejai aipurujauna na!" Ido arai kelip eong yes alomun kinga, aibo alosi eong ayangar yes? Eong ti kayanga yes toma naka ekanisa loka Branham Tabernacle? Erai ngon da loibucarit kwape kaluce kakesi kere.

Konye ejai aiboisit adiopet bon naapedori eong ayangar yes, neiyuarotor yesi ido koyuaritete kama ejai atwanare, erai ngin toma naka Yesu Kristo, aiboisit naka Edeke naka aima. Ngin nges aiboisit na ajai eong aitodiar mamakus, lolo, neabu Edeke kibwaik EkiroriKe. Neabu Ngesi kisumun ebe abuni Ngesi airiamunor ka nginitunganan kere yen abu kolomu toma nen, emai Ngesi nepepe ka ngin ka ainumunum da nepepe ka nges, erai ngin toma naka Kristo: mere toma okanisa edio kere, mere owema edio kere.

Konye, toma Kristo, erai Ngesi Ewema loka Edeke. Erai Ngesi aiboisit naabu Edeke koloma toma, Ngesi Elopset, kosodi aiboikin tomaKe. "Lo nges OkokuKa, lominat, loalelia Eong aiboicotomaKe." Nen nges neiboio Edeke, abu koyangau EkiroriKe kosodi aibwaikin mama ejai, Yesu Kristo. Kanuka ngun, aponi EkiroriKe kibwaikinai toma naka Etunganan, OkokuKe, Yesu Kristo, ne da abu Ngesi koloma Elopset aiboikin toma, ido ejai toma Owema ngol.

Aibo, kotoma aitupuset, Yerusalem namojong, ipucino lumojong, kede eyekalu lomojong, arai aitupuset; nalomunia apuru toma, apaaran na alomaria asaduku toma, naka aitutuket, kosodi asipokin kwape, ido aponi kiirarai Eporoto loka Edeke kama ajai ngin.

Kwape kwangin aponi kiirarere eporoto loka Edeke, elomuni toma Owema lokenyariatai, Yesu Kristo; na da Lomojong (loka akuan) kerai aitupuset ka etoribe loka ngol Lokitetet. Ido nealomaria Ngesi toma naka Kristo, abu Ngesi kotema ebe, "Lo nges OkokuKa loalelakinit Eong aiboicotoma. Ido aseuni Eong aiboisit naebwaikini Eong EkiroriKa, ka nekiriamunor eong ka etunganan, ka ne amaia Eong." Edeke Nges abu koseu aiboisit; mere toma odiini ece, konye toma Yesu Kristo. Eebo, ipa.

38 Ibusakinit da Ngesi "komameotor ka aitoronet," kwape sek alimunitor eong. Emamei ediini loepedori alimorit ngun. Iswamaete kesi; eraas kesi lukasurup luka Kristo.

Kwana kijenuni oni kane, koany etoribeKe bobo. Imerekek-ebait aidario. Kwana, edumakinio nu toma Anyoun 12, arai ijai jo aiwadik ngun, Anyoun 12:3 kiton 6. Abeit imerekek aidario adaun apaarasia aongon, kanu aigimorio, kanu aanyun arai erai ngesi yenibusakinit kanu alosit mama ejai asubanit. Ejai ayangario, kosodete aanyanar bobo ido bobo da, adaun apaarasia aongon, kanu aanyun arai ejai akemer neejai ngesi, aanyun arai ejai ariebo ace neejai ngesi, aanyun arai ejai idiobore erono kede imerekek ngin. Ejai nges aidario adaun apaarasia aongon.

Kwana koany. Ice kayesi aticepak iwomitos ebe arai ngin naadit noi, aario kapaaran naitomonet kaongon. Konye, iitunitos yesi, aponi koyangarai imerekek kapaaran naitomonet naka elap, kosodete ai ar imerekek ngin kapaaran naitomonet kaongon naka elap, itei jo, yenida edaritari adaun apaarasia awongon.

Kwana, Yesu, Ekiror loka Edeke, Imerekek, abu koloma Yerusalem ido mam abu kobongu bobo kiton atwanareKe, aidaio, kede ajarun. Aponi kidarai nges kokwap naka ikecaak adaun apaarasia aongon ka akuaresia aongon. Epone loitekoro loaponi kitupusere Imerekek ngin, aidario adaun apaarasia aongon. Nen nges abu Pilato kotemaria atiar, "Mam eong apedorit adumun amododiakaret kotomaKeng."

39 Etoribe ece loka Ngol, amamei akoit na apedorio aibil kotomaKe, na da arai naetekoro, nemam kes apotu kopedoriat. Kotoma ai ar asubanit, mam kes apedorete aibil akoit. Arai kiswamaun, angerio ngin. Ido apotu kesi kijesutu enyodo kwap loabeitor abilabila akojo nuka akejen nuka Kristo neatemariata kesi ebe, "adau Ngesi atwanare." Kicumete do kesi esiepike kosodete adumun Aokot ka akipi.

Koany bobo icebore yen epol kane. Mam eong akoto ailokony nges, naarai abwoikinitai Nges kotoma ainakineta, ainakinet naka akiria

Eitunit eong apak adiopet ajaatar kesi ka esomero, kotoma Obaibuli, loanyaritai esomero loka inabin, ido arai esomero ba. Ido kidumuni oni ebe abu Eliya kolot kaju ngina osomero ngol apak adiopet, kosodete kesi atemar ebe, "Isio..." aponi kilipai nges anyoun, kobalasi, "Neijaar jo ne, eraas iboro lukener eitena noi." Aso akotosi kesi nges anyoun alosit waice.

Kosodete kesi alosit kinga kanu adumakin nges inyammat lukatibong. Ido abu atukos naka isasedotin kolototo kinga, araibonat inabin, kanu adeun edia, kanu ti aipoikin nges. Ido naaeswamauniata kesi ngun, apotu koyautu etunitos ileleba egoe; ido naabongunioto kesi, kerai imonyono lukais, lu da eraasi epoison, kosodete kesi aigetakin kes amot. Kogeuneteamoti akula, kosodete kesi, icetunganan, atiar, "Wu okwe, ejai atwanare toma amot. Kwana mam da ber isio kipedori ainyam."

Kotema Eliya atiar, "Koinutu eong akiria adis ileleba akan." Ido abu ngesi koyanga akiria ngun kosodi acakakin toma amot, kosodi atiar, "Konyamata. Etangaleun amot."

Ainakinet naka akiria kerai Kristo. Airieokec ajai aibwaikinio koipone loeputo, ido kanginitiakunet naka akiria ajai airiaario koipone loeputo, kanuka ainakinet naka akiria. Aitodiar ebe erai Ngesi eketangaleon. Isiecakini Ngesi, ka alemar da atwanare awai, kosodi aibwaikin Aijar; kanuka ikisila luaarei. Aleluya! Neejai atwanare, aiboisit adiopet; neelomunia Kristo toma, kolomuni Aijar toma. Erai Ngesi ngopengol bian, lolo, ka ikaru kere. Ido nen nekejai atwanare toma, abu nen koraun Aijar, naarai aponi koyangaunai Kristo ngol toma, ainakinet naka akiria.

Epone lo ti eraunotor iboro lu nuepolok nukisisiauna arai kiyangaiki oni apak atiakunun kes kinga! Kwana koany, emamei akirot adiopet da naka itoribei naikarun. Mam ikarunitor karaida akirot adiopet, naka etoribe. Nginibore kere itupusitai epone loitekoro.

Erai Ngesi aiboisit naka Edeke naeseunitai kanu amaia, ido einakinitai Nges Ekiror loka Edeke. Erai Ngesi Akirot naka Edeke, ido erai Ngesi Ekiror loka Edeke. Erai Ngesi kaimoriarit Akirot naka Edeke ka Ekiror da loka Edeke. "Kerai Ngesi Akirot erauna akuan." Kerai Ngesi Akirot naka Edeke, Imerekek yenika Edeke, Ekiror loka Edeke, ido arai Edeke. Ngun nges kerai Ngesi, aiboisit adiopet bon ido naeseuna naka amaia Edeke.

40 Ido engerit Edeke aiboisit ace bobo kere kilema toma naka Yesu Kristo; mam jo ipedori aima Nges kanenice kere. Abala Ngesi, "Emaete Eong atitai, kisisianakinete aicorakineta nuka itunga." Lolo kijai oni ka aiyuuneta, akiro nueomitai aomit ebe, ka nginibore kere, nuisisianakinete ebe *lo* nges erot ido *ngol* nges erot.

Ido abu Yesu kotema ebe, "Arai Eong Erot, Abeit, ka Aijar da, ido emamei etunganan epodori abunore mama ejai Papa dimikito arai itorunit mamaKa." Kotoma akiro ace, "Arai Eong Ekek loelomari toma anuk naka amerekekin. Kere luejaasi kinga eraasi ikokolak." Nges bon nges erot lodolokinet. Erai Ngesi Ekek. Erai Ngesi Erot, Abeit, Aijar, ngun kere nuejaasi nen; nges bon alomaret, aiboisit bon, aima bon, Ekiror bon. kapak kangin ejai; ekek ediopet bon, aiboisit adiopet bon, aima adiopet bon, Ekiror ediopet bon.

Nginibore kere ewenikinitai mama ejai Yesu Kristo. Aitutuket Namojong kere ewenikinitai mamaKeng. Aitutuket Nakitetet ewenikinitai mamaKeng. Ido ekanisa lolo ewenikinitai mamaKeng, kanuka Akirot naka aicorakineteKe. Emamei bobo aiboisit ace, araiboot ekiror ece, araibonat nenice kere, neisumunikit Edeke kanu airiamun ka etunganan; kilema bon toma Yesu Kristo, aiboisitiKe naeseunit Ngesi naka aima.

Koany, adau Edeke aisumun airiamun ka ikamaakaKe kotoma aibosit adiopet bon, ido erai ngin naka aseuniKe Nges Elopel, mere aseunetewok, mere aomitewok; konye nnewomit Ngesi, aseuniKe. Ido abuni ngin araut aiboisit naibwaikinit Ngesi EkiroriKe, neabu Ngesi koseu. Aso kidumuni do oni ebe kidumu oni nekejai EkiroriKe, neabu Ngesi koseu, kanuka aseuniKeng Kelopet.

41 Kwana kwape kidaunia oni adumun aiboisit naabu Ngesi kibwaik EkiroriKe, erai ngin, toma Kristo Yesu, ido emamei bobo aiboisit ace, araibonat ekiror ece, yesi isimonokina kede ngun? Kotema, "Amen." [Kotemari atukos ebe "Amen."-Ekewa.] Kwana, ibore yenika ngin nges yenita, arai kidumu oni neejai aiboisit...Aiboisit naemaere mam ecamunitai kanenidio kere, bon toma Kristo.

Ipedori jo aitoronokin, ipedori jo aswam ngun, konye mam ber jo ijai aima. Ijai jo amoote aitimio. Abu Petero kotema ebe...

Ido kotoma apaaran naka Pentecost, neapotu kesi koanyuniata kes kere ineraasi ka angajepa, ka aanyuneta ka aumonokineta nuepolok iswamasi, apotu kesi kogeutu akiena, abu ekanisa kokieni, kosodete atemar ebe, "Emerasi itunga lu. Esubitos kesi bala itunga luemerasi. E..." Mariam abekot, kes kere, ajaasi nepepe, akwatat ka akaisaarei kakesi. Ido egetasi kesi bala itunga luemerasi, ido kinerasi ka angajepa, ido iswamaete kwangin. Apotu kesi kotemasi ebe, "Emerasi itunga lu ebino lokitetet."

42 Konye Petero, enyouni aibwo, abu kotema, "Ikiliok ka iinacan, mam itunga lu emerasi ebino, naarai erai esawa lokiuniet loka apaaran. Konye nu kes nuaabu enabi Yoel kinerite ebe, 'Ido ebuni ajaun ebe kotoma apaarasia nukawasia, ebala Ejakait, abukokini Eong Ekamoyo mama ejaasi awate kere; edwarete odwe kus ka adwekus nupesur; mama ejaasi ibulesiniKa ka abulesiniKa abukokini Eong Ekamoyo. Abuni Eong aitodiar aanyuneta kotoma kuju Akuj, ido toma akwap; akim, ipirin luka akim, apuri naka apuru. Ebuni ajaun ebe, kere yen iworoi Ekiror loka Ejakait itajario.'"

Nekiirariata nu, koditasi itauonocec, kotemasi da atiar, "Ikiliok ka iinacan, nunyoika ibusakinit isio aswam?"

Abu Petero kotema ebe, "Kitoronokinos, nginidiopet kayesi, ido kibatisaunos Kokiror loka Yesu Kristo kanu aisionio naka adiaakanaretakus, ido idumunete ainakiniet naka Emoyo Lokalaunan. Naarai erai aisumunet kanuka aturio kere nukoingaren." Kwana kidumuni oni ngun.

43 Kwana ikoto oni ajenun epone loipedoria oni alomar *toma* naka Ngol. Eipone ali kilomaria oni toma aiboisit naka aima na? Ikorinton Losodit 12 nges itemokini ngun, naarai, "Kanuka Emoyo ediopet!" Mere kanuka ekanisa, mere kanuka aiyuunet adiopet, mere kanuka ekecokon ediopet, mere kanuka episikopi ediopet, mere kanuka esasedoti ediopet. Konye, "Kanuka Emoyo ediopet, kibatisaikinitai oni kere toma Akuan adiopet," na da erai Akuan naka Yesu Kristo, ido kobeite oni nginiinakiniet naejai toma Akuan ngin. Eebo, ipa! Mere aimorikikin, mere alimonor aiyuunet, mere aisikio, aituor, aijang akanin, araibonat emamei imodiobore kere. Konye, kanuka Aurio kibatisaikinitai oni kere toma Akuan naka Yesu Kristo! Amen. "Kanuka Emoyo Lokalaunan ediopet kibatisaikinitai oni kere toma Akuan adiopet."

Ido inyobo Akuan ngin? "Kotoma ageunet ajai Akirot, ido kojai Akirot mama ejai Edeke, ido korai Akirot Edeke. Ido koraun Akirot Akuan kiboiororoi ka oni." Epone ali kipedoria oni ajaut toma Akuan ngin ido kangeritos Akirot naka Akuan Kangin, araibonat aibwaikin Ngin nenice ne mam ber erai toma Akuan da? Epone ali cut kipedoria oni aswam ngun?

44 Aiboisit naeseunit Edeke!

Koany, ido neibatisaikinitere jo tomaKe kotoma abeit, ajenanut nakabeit nges na ebe iyuuni ijo Ngesi, Akirot.

Epone ali ipedoria jo araut atutubeteKe ido kongerite Nges? Epone ali apedoria eong ainger ebe mam akanika erai naka? Ejai tope...Arai keswama eong ngun, ejai ibore yen erono ka adamaka. Ido ekwakini eong ai eswamauni ngun? Arai ejai icebore yenerono ka adamaka, ainger ebe mam ngin erai akanika, ainger ebe mam ngin erai akejuka, ejai icebore yen erono komoyo ka eyuunan loengeri Akirot adio kere naiiritor Edeke alumun ka aisumun da. Ejai icebore yen erono komoyo ka ngol loenyaraikina bon ebe erai ngesi ekeyuunan.

Mam jo ipedori ainger enyukuta ediopet loka Ngol, naarai iraun jo atutubet naka ngupekangun. Irai jo atutubeteKe naarai kibatisaikinitai jo tomaKe; kanuka, ayangau jo Emoyo Lokalaunan toma

45 Ibore yenibus bo yen!

Ajaatar Edeke aiboisit ace naabu Ngesi kiriamunotor ka Aburaam, ido nen nges abu Aburaam komaia.

Anatar kotoma Aitutuket kere!

Ido AkirotoKe naisumunitai eponio aijulun kotomakon, Ngesi. Ijo imisiik ngun? Akirot naabu Ngesi kisumun aitodolikin kotoma apaaran najari jo kotoma: ibuni jo araun ebaluwa loiwadikatai loka Edeke, loesiomete itunga kere. mere nuilimit jo, konye nuiswamai Edeke kotomakon, epote einer kikeseuna adepar idiobore kere yenilimorit jo. Abu Edeke kotema ebe, "Etupanakinete aanyuneta nu ngul luyunete." Inera do ngin kotomakon.

Abu Ngesi kiner nuka aturi kana, nuapote ajaut kwana. Iburai ikeyuunak luka atur kana aiyuun Na, naabu Ngesi kisumun lolo. Cut kwape ajaar kes alomun toma ataker, kanu aitajario; anyoun ko Misiri kanu aitajario; ejai kes abunore mama ejai Kristo, kanu aitajario kwana, toma Aisiiraret naka Akirot, ebe Nges ngopengol bian, lolo, ka ikaru kere.

Eipone ali ilomaria jo toma Kangin? Kanuka Aibatisao! Aibatisao naka inyo, akipi? Naka Emoyo Lokalaunan! "Emoyo Ediopet, kibatisaikinitai oni kere toma Akuan adiopet."

46 Ido AkirotoKe naisumunitai, mam Nges ikoni...Mam ipuda jo aijulun Ngin. Ijuluni Ngesi ngin kitorite mamakon; nuijai jo aswam, nuabu Ngesi kisumun aswam. Ekanisa loetupit Nges ebuni aputor Nges aitodol neejenuniata itunga.

Kosesen ber jo Petero ka Yokana neaponi kitoosaere kesi kanuikamunitos aitangaleun etunganan korute loenyaritai ebe Loibus. Apotu kesi kotemasi, "Apotu kesi komisiikisi," apotu isasedotin ngul komisiikisi ebe, "ebe araasi luare lu itunga luadit aijen ido mam esisiatos da," komisiikisi ebekejaas kesi ka Yesu. Naarai, (inyo?) ajaasi kesi aswam iboro luabu Ngesi kiswamate.

Iburai Nges ajaut aswam aswam naka Papa. Ido lolo ekoto ikoni nepenen.

Kwana, kiitu ebe, erai Ngesi Ngopengol bian, lolo, ka ikar kere; naarai iriamunos Edeke ka jo kotomaKeng, aiboisit adiopet bon naejai; naarai nen nges abu Ngesi koseu aibwaikin EkiroriKe, toma naka Yesu. "Yesu" nges Ekiror loka Edeke. Kiitu, Papa, Okoku, Emoyo Lokalaunan, eraasi imaeta luka Ekiror "Yesu Kristo."

47 Neabu Matayo kotemara ebe, "Kolototo yesi, kisisianakisi akwapin kere, kibatisaete kesi Kokiror loka Papa, Okoku, ka Emoyo Lokalaunan."

Epone loejulunere ngin erono lolo, kosodete atemar, "Kokiror loka Papa, kokiror loka Okoku, kokiror loka Emoyo Lokalaunan. Mam da ber ngun iwadikatai. Erai, "Kokiror," ediopet, "loka Papa, Okoku, ka Emoyo Lokalaunan." *Papa* mam erai ekiror, *Okoku* mam erai ekiror, *Emoyo Lokalaunan* mam erai ekiror; erai emaetait.

Akaulo na apaarasia atomon, abu Petero konyou aibwo kosodi atiar, "Kitoronikinos, kanginidiopet kayesi, ido kibatisaunos Kokiror loka Yesu Kristo." Apolouke abu ngesi kiswama numam Ngesi abu kolimok ngesi aswam? Abu ngesi kiswama nuabu Ngesi kolimok nges aswam. Ekiror loka Papa, Okoku, ka Emoyo Lokalaunan nges "Ejakait Yesu Kristo." Nginitunganan kere kotoma Aitutuket Nakitetet aponi kibatisai Kokiror loka Ejakait Yesu Kristo.

48 Ememei itunganan karaida idiopet kotoma Obaibuli yen ibatisaitere kotoma omaeta luka Papa, Okoku, ka Emoyo Lokalaunan. Mam cut ngin abu kojaun aitodol neaponi kibwaikinere aiyuunet ngin nako Nicaea, Roma. Arai ngin aicorakinet naka ekanisa loka Atuliki, abu kodum, ido aigang ibore ngipengin, kotoma atikasimu. Kijaar eong kangin, erai ngin naabeit, *Nukabeit Nuka Aiyuuniwok*, ka ace da ngun, ebe erai cuticut ngin aiyuunet naka Roman Catholic. Elimokinete kesi jo ebe emamei ngin kotoma Obaibuli; konye ebalasi kesi ebe ejaatar kesi ka apedor aijulakin Akiro ngun, arai ekotosi kesi, kanuka Ipaapa. Mam eong acamunit.

Yesu Kristo nges Ngopengol bian, lolo, ka ikaru kere. "Ido yen elemari Akirot adiopet kotoma Ebaibuli kalo," abala Yesu, "araibonat aiyatakin akirot tomaKe, elamario ewaike da kotoma Oitabo loka Aijar." Akirot adiopet; mere ekokoro, araibonat atiakunet, konye Akirot adiopet! "Kere yen elemari Akirot adiopet..."

49 Kageunet, abu Edeke kobwau itungaKe ka AkirotoKe. Akirot adiopet, ijulunitai erono, nges abu koyangau atwanare, ariebo adio kere naka etau, aiturur adio kere. Keba, mam ngin abu kobil ekokoro ediopet;abu ngin kobil Akirot adiopet. Neabunio Yesu kokiding naka Eitabo...Arai ngin nasodit naka Eitabo.

Neabu Yesu kobunio kokiding naka Eitabo, nunyoika abu Ngesi kolim? "Iwadikatai ebe emamei etunganan loebuni ajar kanuka atapa bon, konye kanuka nginikirot kere naelomuni kinga kakituk naka Edeke."

Kotoma awasia naka Eitabo, Apukokinio esula lo22, ekokoro lo18, atutubet cut nakawasia naka Ebaibuli inera Yesu Ngesi Elopel, ebala, "Etijenari Eong ebe arai kelema imodiotunganan Akirot adiopet

kotoma Oitabo kalo, araibonat aiyatakin akirot adiopet tomaKe, elemario ewaike da kotoma Oitabo loka Aijar," naarai erai Ngesi enabi lokaingal ido ejai aijul erono Akirot mama ejaasi itunga, ido imarakinio aokotokec akaninike, nuka aswam ngun.

Ibusakinit oni aidar aiboisit adiopet ngin naka aima, ngin nges, Yesu Kristo loerai Akirot, ngopengol bian, lolo, ka ikaru kere. Amen. Mam ace. Kiitu ebe, emamei bobo aiboisit ace naka airiamun kanu aima, emamei aiboisit. Edeke nges abu koseu Ngin.

50 Yokana, kokau cut kangina kotoma arucokinet kiding naka Aitutuket Nakitetet ka Namojong. Kopupok ejok kwana. Komisiik ejok. Yokana, emorukaalet ngol lopeti, ebuni eporitoi kamoding apaaran adiopet, koterarite abebenokake nutieik. Abu ngesi kodo kwap ariri naka Yorodan, enabi Lokapolon lomorukalet loabu korucok erot kiding Aitutuket Namojong ka Nakitetet, ido abu ngesi konyara kes ageun koteten kiton kediany. Ajai ngesi iworot apaaran naka aitoronokin.

Nealomuniata Iparisayon ka Isadukayon kinga; abu ngesi kotema ebe, "Siri kigeutu aineranakin kanukus ebe, 'Ijai sio ka Aburaam kwape papakosi,'" naarai epedori Edeke aitonyoun idwe kanuka Aburaam kama ejaasi amoru nu." Oo, ikatunga!

Neageunia ngesi acakunun Akiroke Nukajokak kinga, ka alimun da ebe, "Ejai loebwoi kakidingosikus Lomam yes ijenete. Mam ber eong ajenit Ngesi, konye ajenuni eong Ngesi neebunio Ngesi. Mam eong kebusakinit alacar amukaKe. Konye ebuni Ngol aibatis yes ka Emoyo Lokalaunan ka Akim. Ido ejaatar Ngesi ka adaet akaniKe; ebuni Ngesi cut apiar alaroKe ejok, ebuni Ngesi aicwear agugu ka Akim namam itudengio."

51 Emorukalet Lokapolon loka Akiro Nukajokak iboie kanen, kwape abu ngesi koruor aitukurianetake nuapolok. Kosodi amodokok alomun kinga, araibonat Kerode, ekayaiton loka apak kangin, ekatubon, abu kodukok aberu onaceke. Ido tope jo tikipedo ainomar emorukaalet ngol lopeti loka Akiro Nukajpokak ti aiboi kanen kinapakina kanuka ngun?

Ice kakesi apotu kotemasi ebe, "Siri kereka jo kilimonok nuka edukone ka elakit kwana, naarai Kerode kereka je iboio kalaije."

Abu ngesi kolot kiton akonyeneke kosodi atemar, "Mam isiikinitai jo ajaut ka ngin." Abeit!

Inyo, ngesi, kerai ngin? Arai ngesi emorukaalet kotoma amoding. Mam nges etutuoritari kokwap naka akurian ka aitukurianeta nuka etunganan, naka idiinin ice. Konye etutuoro ngesi kokwap naka apedor naka Edeke loka Apedor kere, kanu aijen nualosete ajaun nen. Ajeni ngesi epone loajaar Mesia.

Aleluya! Apolou naka akirot kangin erai, "Ituritete Edekewok!" Siri ikuriakata. Mam eong etuguikinitor idiotunganan ber. Mam eong ariengunit. Ajeni eong cut neajai eong.

Oo, ne aoomoma eong nuka ngol, emorukaalet ngol lopeti eporitoi kokinga kangina kasodi aido kwap! Abu ngesi kotema, "Ajenuni eong Ngol naedolunio Ngesi."

52 Kadiope paaran abwoi ngesi kanen, ejai alimonokin. Ajaasi isasedotin okekwa epuwai, kobala, "Apolouke ebunit apak naeponere alemar asubanit naka nginipaaran; eyekalu lokapolon lo loiduk oni, ka aswam kere nakipou oni kebwaikisi, oni ediini lokapolon?"

Abu Nges kotema ebe, "Ebunit apak naelemarere ngun kere."

"Mam ngin epedor. Irai jo enabi lokaingal!"

Kosodi ngesi angolengole kanen. Kotema ngesi atiar, "Koanyutu, nges Ngol kanen! Ngin nges aiboisit naka Edeke naeseunitai kanu amaia. Ngin nges Imerekek, Imerekek ilopet yen elemanari arokisio nuka akwapin." Mam nges abu kotema atiar, "Loka Methodist lo abu, loka Baptist lo abu, araibonat loka Atulik." Abu ngesi kotema ebe, "Koanyutu Imerekek yenika Edeke yenelemanari arokisio nuka akwapin."

Aiboisit adiopet bon naka ayuara naejai nges toma naka Imerekek yenika Edeke. TomaKe bon nges ejai aitajario; mere toma okanisa, aiyuunet adio kere, itunga ice, papa edio, toto adio, ediotunganan lokalaunan edio kere, araibonat imodiobore kere, aiboisit nakalaunan. Erai toma naka Edeke Lokalaunan, Ejakait Yesu Kristo, neabu Edeke kibwaik EkiroriKe toma naka Etunganan, kanuka alakunio, Loabu kotac etiai kanuwok ikadiakanarak. Ngin bon nges aiboisit naejai aitajario. Ngin nges atiida nabwoi eong kotoma.

53 Abu Yokana kojen Nges. Abu kotema ebe, "Mam eong ajeni Nges neanyunia eong Nges ebuni elosi, konye kinga ngina neadumakini eong asiomanika..." Mere toma osomero loka ediini kwa adumunia papake; mere kwape esasedoti, itutuoritari. Konye toma amoding, neajaar ngesi toma osomero loka ediini loka Edeke lokapedor kere, ejai idarit Akirot naka Edeke; mere nuepopounit atukos ace naka itunga, konye nualimunit Edeke kanuikamunitos Ngin. Ido neabu Yokana kongoliaria kuju kosodi aanyun Emoyo ebunit, abu ngesi kotema, "Etijenari eong ebe, erai Nges lo." Oo, ikatunga!

Ngin nges aiboisitikon naka aima. Ngin nges angopisikon. Engin Imerekek yenika Edeke yenelemanari arokisio nuka akwapin. Mere ekanisa ece, mere aiyuunet, araibonat imodiobore kere, konye Imerekek yenka Edeke yen elemanari arokisio nuka akwapin.

Itei jo epone loabu Yokana kibwaikina ngin? Mam nges abu kotema ebe, "Yes Iparisayon idolitos, yes Isadukayon, yes luka Kerodians." Abala ngesi, "Imerekek yii Ngin kanen." Ngin nges aiboisit. Ejaatar Ngesi ka Ekiror. Erai Ngesi ngol. Emamei bobo Ekiror ece kokwap naka Akuj!

54 Kosesen nuabu Yesu kolim kanuikamunitos Yokana kwana. Kadiope paaran abu Yokana kijuka itunga mamaKe, kanu aanyun nuajai Ngesi aswam. Abu Yesu kotema kanukeng, "Arai ngesi aica ngin naepol na acai," kanu aitodikin kes esokot lokabeit lo ebusakinit kes aitup eringa AbunoreKe na lem edaritai adaun aojau, abunoreKe nasodit. Kopupok ejok. Siri kitwania ngin. Abu Yesu kotema ebe, "Arai Yokana aica ngin." Malaki 3, emamei aibucaret! Enabi loajaatar ka aica naapol nges abu kitodia Yesu araut Ngesi bon, "Imerekek ngin." Imerekekin luce ngul kere luenerasi isasedotin ngul nukec, ka iboro luce ngun kere, araasi lukamamus aijen. Ajai "Imerekek ne!" Etunganan loajaasi ka aica naepol na acai, loabu Yesu kotema ebe arai ngol.

Malaki 3 ebala ebe, "Ejukuni Eong ekiyakaKa ageikin Eong aitemonokin erot." Ido ngol loejukunitai aitemonokin erot, abu kitijena Ngol, aiboisit. "Nges Ngol! Emamei aibucaret. Nges Ngol! Aseseni eong aanyunet etupit Ngesi. Ajeni eong ebe erai nges Ngol; Aica ijesun kwap kotoma Akuj kosodi alosit mamaKe." Arai ngin naajok, kerai nges Ngol.

55 Kosodi, do onaceka, akoto eong aingit jo icebore, kotoma agolokin. Ipedori aticepak oni alimun nuta. Kotoma Malaki 4, mam kereka isumunitai oni da emorukaalet ece, Epir loka Aica araut loetupit, kanu aitodikin ekanisa loibucanari ebe erai Ngesi Iburanian 13:8, "ngopengol bian, lolo, ka ikaru kere"? Mam kereka kisumunikinitai oni ece abunore eporitai kamoding? Amen! Erai ngin cut Abeit. Epone loilesikinar ido kiriamara ka ngin naebala Luka 17:30, ne epukoror Okoku loka Etunganan (Emorukaalet) kanu aitamamaun ajokis kama ejai aiboisio ace nuka aima, kwape nat idiinin ka nuce ngun kere!

Abu Edeke koseu aiboisitiKe. Abu Yokana kotema ebe, "Nges Ngin kanen!"

Kosodi konyet isumunitai oni ibore ngipengin kotoma apaaran kana, Malaki 4, "Kanu aibelokin itauon luka idwe mama ejaas," atemar ebe mam Nges etwanit, mam iboro lu eraasi kanu atur ace; aibatisao Kokiror loka Yesu Kristo mam kerai kanu kolo sek kokau kangina, konye erai kwana Ngesi Ngopengol. Amen. Kanu aitamamaun ajokis naka aiboisio ace nuka aima, ngun kes nuebeit emorukaalet loka apaaran nakawasia aswam, aitodiar ebe luce ngun kere erai amamus aijen, erai ediini epali, konye kanu aidod kes bobo kede aanyunet ngin naabu Ngesi kismama, ebe erai Nges Ngopengol bian, lolo, ka ikaru kere. Aleluya.!

56 Bobo da, kotoma Apukokinio 4:7, kijaar oni ka Itiang iwongon luarai adaun oni aitor toma napena.

Losodit arai, apotu oni kajenutu ebe...ajenun, arai engatuny. Arai ngol Etiang losodit loabu koloma kanu aitereikin ka ainingosit naka apaaran kangin, Engatuny loka ateker naka Yuda.

AkauloKe kobuni Etiang loatupakini. Ido kidumuni oni ebe, Etiang loatupakini arai emong, lo da kerai letiang loka abwokon, asubanit. Kotoma apaarasia nuka akelesia nakapolon naka Iromayon, abu Ekanisa kotwana; asubanit.

Kobuni loatupakini, arai etunganan, arai Etiang lokejaatar ka ereet loka etunganan. Ido etunganan ngol arai lukesiteteunak, asioman naka etunganan, aisisia ediini, ka ace ngun kere.

Konye Etiang loabeit aipor, Lokajaran loabeit atupakin abunore. Ebala Ebaibuli ebe kerai Emorukaalet loeporitai. Aleluya! Ido abala enabi, kotoma apaaran kana, "Ejaun Aica." Oo, ikatunga! Kotoma apaaran kangin ebuni Aica ajaun."

Ajaikina apaaran naka kalu ikesiteteunak. Ejaunar apaaran naerai bon etoribe, mam jo ipedori anyara ebe apaaran araibonat kuare. Konye kotoma apak nakatiibong, toma apak naka Emorukalet:

Ebuni aica ajaun nepetai apak naka Emorukalet,
Nabeit idumuni jo erot loebeari toma Aibuses;
Toma orot loka akipi nges Aica lolo,
Idaikinitai Kokiror loetiai loka Yesu.
Ludidik ka luemojongito, itoronokinos kanu adiaakanarekakus kere,
Nabeit ibatisaikini yes Emoyo Lokalaunan toma;
Naarai abuu Aica nakatibong,
Erai abeit ebe Edeke kede Kristo erai Ediopet.

Amen! Ebuni Aica ajaun nepetai apak nakatibong, aiboisit bon naka Edeke naka aima.

57 Oo, inyobo abu Aisiiraret namamake, inyobo elosi Ngesi aswam? Ido kotoma apaaranike ebuni araun

Aica apak nakatibong, ido (inyo?) aisukunyun idweKe abongun ore toma Akwap nakabeit naka aisumunet, ka aanyunet naka Epir loka Akim Loabu kingarenik idwe luka Isirael aitor amoding.

Aiboisit naeseunit Edeke kanu aima, Yesu Kristo. Ngin bon nges aiboisit naejai. Ekiror bon loejaatar Edeke kanuka aitajario. Ngol nges amaiki Ngesi ekale loejai toma Akuj, naejaar toma akwap, erai Yesu Kristo.

Wu ekanisa, Wu itunga, opapero lokadiakanaran, siri kimunokin imodiobore kilema Yesu Kristo. Siri imunokin ekalimonokinan edio kere. Siri imunokin idiotunganan kere kanu aitajar jo. Siri imunokin ekanisa edio kere, aiyuunet adio kere, ediini edio kere. Omunokin Yesu Kristo bon, naarai erai Ngesi Aica naka esawa.

Etuluroto akwesiwok.

Ebuni araun Aica toma apak nakatibong,
Nabeitu ibuni jo adumun erot loebeari toma Aibuses;
Kotoma orot loka akipi nges Aica lolo,
Kidaikinitete Kokiror loepol etiai loka Yesu.
Ludidik ka luepoloritos, itoronokinos adikanaretakus kere,
Nabeit elomari Emoyo Lokalaunan toma;
Abu Aica nakatibong,
Erai ngin abeit ebe Edeke ka Kristo eraas Ediopet.

58 Oo, onac, iinac, arai eringa jo kitoronikina, arai mam jo ibatisauna Kokiror loka Yesu Kristo, ijo itegeari ngun lolo? Ijo ti kiinak Edeke arereng naka aisukunyun jo toma naka aiboisit kangin naipedoria jo aima Nges? Kiitu ebe, kinga naka nen, emamei aiboisit naabu Edeke kisumun airiamunor ka jo ka aisukunyun da aimakon.

Ibala jo ebe, "Onac Branham, amai eong da cut kede etau loipiororoi!" Kwape kwangin amaia Kain da. Abu ngesi kiswama eipone edio kere loka ainakinet kwape abu Abel kiswama, konye kerai asubanit naronon. Ipedori aticepak ijo kolosenenei okanisa, ido kotaci idiopet kotomonetakon, kosodi aswam epelukon kwape ibusakinitor Ekristayot aswam, cut ka abeit kere kwape ediokiliokit arai aberu.

Abwo kwana eong kane adaun ikar akaisauni, kane koibuga, kasodi aiworo Aisiiraret napena. Ajai eong amojong. Mam eong alosi adaun apak naeoj ajai nepepe ka yes. Konye kiitu ebe, kotoma apaaran naka Etube, ikamunitai eporotoka, ido ebuni eporoto ngol einer asurokin jo.

Ejai aiboisit adiopet bon naibwaikini Edeke EkiroriKe, ido mam ngin erai toma okanisa, konye toma naka Yesu. Ejai aiboisit adiopet bon naka aima, aiboisit adiopet bon naijaunitere jo, ido erai ngin kotoma Lominat, Yesu Kristo. "Emamei Ekiror bobo ece kokwap naka Akuj, loijaikinitai kama ejaasi itunga, kanu aitajario," emamei ekanisa, emamei aiyuunet, emamei imodiobore. Yesu Kristo!

Ido ebeit ti ngin araut Aisiiraret naka esawa, "Ainyakakin itauon luka idwe mama ejai aiyuun na kolo aponi koinakinai lukalaunak." Mam kereka jo ibuni acamuni Ngin lolo?

59 Ido kwape kituluritor awokokwes.

Ido ngul luekotosi aiitunio kotoma ailip, ikeutu yesi akaninikus kuju. Mam isio ipedori anyarar itunga otut, naarai ipu noi. Isirereng Edeke yes. Ikatunga! Kedianyika, aomit eong ejaasi akwatauni.

Kwana tetenika, ikeutu cani akaninikus, atemar, "Akoto eong aitunio." Aomit eong ebe ejaas akwatat kede akaisakany, araibonar adepar da, kotetenika.

Ijai isio ka ekanisa kwap ne loejai aipany naka akipi naibatisaere naepol, ekecokon, ekecokon lokajokan, Onac Orman Neville, luiswamaete nepepe, itunga luejaas ne luiseseni jo ka airiamununor. Nginipak, kanginikuare, apak kere, itunga luekotosi aibatisao, luadautu aitoronikin, ejaasi duc idaritos. Ido arai irima jo aicorakinet, ijeni jo kodoco, kanuka aisumunet naka Edeke, arai inera jo abeit kotoma otaukon, kanu ajaun aibatisao naka Emoyo Lokalaunan.

Ejai aiboisit adiopet bon naka aima. Kwana, mam ngin erai toma owema. Erai ngin toma Kristo. Epone ali kilomara oni tomaKe? "Kanuka Emoyo ediope kibatisaikinitai oni kere toma Akuan adiopet."

Kelipa.

60 Okwe Edeke, kwape ekeunere akanin nu kuju, apotu kesi kitodiasi nuejaasi kwap naka akan kangin kotoma otau, aitepesenet nabeit ebe ipudasi kesi aingarakinio kamaKon. Elipi eong kanuka nginidiopet kakesi, wu Papa. Ido alosi eong atakun AkirotoKon. Ibu Jo kotema ebe, "Ngin yen iirari AkirotoKa, kosodi aiyuun Ngol lokejukuni, ejaasi ka Aijar naka ikaru kere, ido mam ebuni toma Atubokinio; konye atubun kotoma atwanare kiton Aijar."

Papa, anyoun koibuga adaun isabiitin idis, abongun, aingit, "Nuikamunitos idiopet yen?"

"Kanukinyo, adautu kesi anyoun."

"Eebo, dobo do..."

"Adautu kesi anyoun..."

Edeke lominat, kinyaraunitai sio idiopediope, ido da kiriamun isio idiopediope ka ainingosit naka alosit aijesar kotoma aditot naka etoribe loka atwanare. Ido eyapie ngin kanuka nginidiopet ka sio, kwape itunga luetwakete. Konye, lolo, iinak Ijo isio erotoKon, ebe arai kiyuuni isio Nges kosodete aibatis isio KokiroriKe, ebe ibuni Joayangaar sio toma. Kosodi do kotoma Akuan kana, Akuan naka Kristo, mere toma okanisa, konye toma Akuan naka Kristo, adaun Akuan ngin atubokin da. Mam Ngin ebuni toma Atubokinio. Abu Edeke kobukok anyunyuraKe mama ejai Akuan ngin, ido emamei aronis kotoma Akuan kangin; ido, ajaut tomaKe, ibwaikini ngin so araut luilacakina kama ejai aronis, kanu ailucuKe ebe abu Ngesi kotwana kanukosi. Kotoma kangina kijai kede eidicane idiopet ka ngince, kwape kidariata Aokot nuka Yesu Kristo sio kalaete komamei aronis ka amunaun.

61 Papa, Edeke, elipi eong ebe iyangari jo nginidiopet kakesi toma Akabakanut Kon. Kopedoros ngun, wu Edeke. Kinyei idiopet kakesi awolior; kinyei etelepat edio, araibonat apese, ekiliokit araibonat aberu awolior. Ejakait, ice kotungaka obe iboiete kane, lolo, luejaasi kinga naka Aokot. Epone loeitunitor eong ejok noi akiro nuka papaka! Ido elipi eong, Edeke Lominat, ebe kinyei idio kakesi awolior. Kisipedo ngun, Ejakait. Ajai eong aiyuun Jo kwana, ka kere nuajaatar eong kanu aiyuunia.

Kodoik mama ejaas iinacanaka, ainacan, ipaperoka, kane kotoma aiboisit kana lolo ka kinga ngina toma osimu. Aiboisio ace nupu erucokina toma, ageun Oitolima loko Kide kiton To. Elipi eong, okwe Edeke, kwap ngina juwai naka amoding ngin toma naka Tuckson, laiije cut toma California, kuju laiije Nevada ka Idaho, laiije Kide ido anatar ne kere, kwap laiije Texas; kwape einakinitere anyarario na, itunga iboiete kotoma okanisan ludidik, aiboisio nuemasere akinyet, oreria, ejaasi epupokinitos. Wu Edeke, kobu ekiliokit ngol, araibonar aberu ngin, arai etelepat araibonat apese naewoliorit mamaKon. Ijaik ngun kopedoros kwana. Kilipi isio ngun Kokiror loka Yesu, ebe edumunete kesi aiboisit naka ayuara eringa apak.

Neiwanyunia sio aiwadikaet naka arwatat, akwap ejai aitipasun, eyapie apak naka alakunio. Ejai atutubet naka akwap kosi alumor kwap, atutubet ya idolidola ka aduonor kede amaran naka akwap, kwape abu Yesu kisumunitor ebe epote ajaun. Kinyei apak ariyar kanukec, Ejakait. Kocamutu kesi ngun kwana, naarai ikopakini isio kes mamaKon kwape ikepikorok luka airiamun kana, naka Akiro Nukajokak, Kokiror loka Yesu. amen.

62 Yesi iyuunitos Nges? Kisirereng yes Edeke. Imwasi ai iyuunitos ebe erai ngin Abeit, kedianyika? Ikeutu akaninikus. Imwasi ai kotetenika? Ikeu akanikon. Kisirereng Edeke yes. kwape asesenia eong, nginitunganan kere iyuunit. Erai ngin Abeit, ipapero. Ejeni Edeke ebe erai ngin abeit.

Kwana ijai jo tomaKe, ido ajaut tomaKe, ipedori jo adolokin nginibore kere yen abu Ngesi kotwana kanuke. Ido inyobo abu Ngesi kotwana kanuke? "Aponi kimusungai Nges kanu adiakariwok, ido kisiriebai kanu epaliwok; ajai alecorio naka ainapakiniwok mamaKe, imacariniKe kes itangaleunete oni." Ijo iyuunit ngun? Yesi iyuunito ailucuKe kanu aitangaleunio wok kwana?

63 Ejai tope yen edeka akidingosiwok? Kikeutu kesi akaninikec, teten ka kediany. Atukosia nuepolok nuka ariebo. Mam eong apedori anyaraun ekokoro. Itei jo, mam eong ber...mam ipedorete abunore otut. Emamei eipone loiswamaet ngun.

Ejakai ka airiamununeta nuka ailip kinga kotoma aiboisio ace, kanuka ngun luedekasi, kotoma okanisan ka aiboisio ace, kokwap kangina kowema.

Alosi eong aingit yes icebore. Imwasi ai ikeyuunak ejaasi nen? Ikeutu akaninikus. Mam ace. Alosi eong atakakin yes Akirot, na da erai Kristo. Ayakian nakawasia naka Yesu mama ejaas akwapin, mere akwapin, Ekanisa, abu Ngesi kolimu nuta, "Etupanakinete aanyununeta nu ngul luyunete; arai kidokokisi akanin mama ejaas luedekasi, engaleunete." Idiibo ejenete ebe erai ngin abeit, Marako 16, kotemasi ebe "Amen." [Kotemari atukos ebe, "Amen."-Ekewa.] Mam ace. Ajai eong ailip jo kwape ikeyuunan aidokokin akanin mama ejai icetunganan yen ejai ingarenikon, ido kelipanakinis bonik kwana. Idokok akanin mama ejai icetunganan yen ejai osiepikon.

64 Ejakait, kane koingarenika ejai akokis ileleba iitabalan, atutubeta nudidik nuka iboro; toto ace naemojongit eperi kanenice, ejai atwanare, ikoku yen eyapiosi ka atwanare, itunga luedekasi kotoma kanginiboisit kere. kisiomi sio kotoma Obaibuli ebe aponi kolemununai kama ejai akuan naka Paul iitabalan ka acaapan, ido aponi kidokonokinai mama ejaasi lukadekak, kosodete imoyon lukaronok ka imoyon luka ajokit, ka ariebo, ka adekasia, anyoun kama ejaasi itunga. Kwana, Ejakait, kijeni isio ebe mam sio kirai Lokalaunan Paul, konye kijeni sio ebe isalakinit ijo irai Yesu, aiboisit adiopet bon naka Edeke naka aima. Ido kwana, lolo, alimosi itunga lu da aiyuunikec ngipengin, aiyuun kwape eyuunitotor itunga ngul. Nabeit idau Jo asubun erot kanukec! Ido edokokini eong akaninika mama ejaas iitabalan lu kasodi ailip ebe adekasia ka ariebasia anyoun kotoma awate nuka itunga luidokokinio kes Kokiror loka Yesu Kristo.

65 Kwana, kisisianakinitai isio, ebe ajai Isirael elomuni ko Misiri, kotoma okokoro loka aswam, ajaasi kesi toma orotokec alosit toma akwap naka aisumunet. Abu Angolol Nakarengan kiriikin orotokec. Kosodi Edeke angolekin kwap kotoma Opir loka Akim, kosodi angolol akurianar, kosodi aidolar kau, ka acamakin da Isirael atubor akwap naka aisumunet. Wu Edeke, kongolia kwap kotoma Aokot nuka Yesu Kristo, lolo, ido kidolar ariebo abongor kau, ido kirengearai Satana. Ido kotuboros itunga toma akwap naka aisumunet naka angaleu naejok ka Agogong, naabu Edeke kotema ebe, "Kotoma akiro kere, akoto eong yes akurianar ka angaleu da naejok."

Ido kwana kwape isesenia Jo ngina, Ejakait Yesu, akanin nuka itunga kalu idokosi kama ejai idiopet ka nginice, ejaas kesi aitodiarit aiyuunikec, naibu Jo kotema ebe, "Etupanakinete aanyuneta nu ngul luyunete." Ejaas kesi ailip koiponekec ikulepek, kanuka nginidiopet. Itunganan yenetupakini ejai ailip kanukec.

Kwana, Ejakait, adumununi ainingosit na, ebe Satan, lopeti loituputoro, emamei nges apedor aiting ikoku yenika Edeke. Erai ngesi etunganan loitelekaritai. Yesu Kristo nges bon aiboisit naka aima, Ekiror ediopet bon lokabeit, abu kipiko nges ko Kalivari. Ido iburaunit sio AokotoKe kwapekwana, ebe abu Ngesi kipiko kanginiriebo kere, kanginideka kere.

Ido alimokini eong Satan anyoun kotoma okodet kalo. Kokiror loka Yesu Kristo, kolom kinga kama ejaasi itunga, ido kolacakinos kesi.

66 Nginitunganan kere yen ecamunit angaleukec anaarai iwadikatai toma Akirot, kiswamau ajenanutukon koipone loka anyoun aibwo kosodi atemar ebe, "Acamunit eong angaleuka Kokiror loka Yesu Kristo." Konyou aibwo.

Ituritete Edeke! Aso konyet jo. Kosesen neta, nuka ingwalasik ka luce ejaasi anyounun aibwo. Ituritete Edeke! Nges nen. Iyuu jo aiyuun. Ejai Ngesi ne. Epone loeraar naeumokina!

Kinga toma atukos, kokinga, kowayai, ibusakinit yes aanyun! Aomit eong ebe nginitunganan kotoma kane, kwape ajenia eong, araibonat luipu kakesi, ejaasi ebwoete kotoma apak kana. Oo, otukui apak naeumokina! Ajakut naka Ejakait, erai ngin inyobo! "Ne ejai jakut naka Ejakait, ejai ailajara, ejai alacakina." Emoyo loka Edeke nges kilacakini oni.

Kwana kwape adaunia Ngesi aitangaleun oni, iyuunit oni ngin. Abu Ngesi kolaku oni; iyuunit oni ngin. Ngul luekotosi aibatisao, ekapakina neibatisaere. Adiopak kere, esawa edio kere loikotor ijo abunore, ejaun icetunganan ngina yen ingarakini jo.

Ido kwana awomit eong, eringa oni kegolokina, ejai oni ayeikin ekosio lomojong loka ekanisa. "Amina eong Nges. Amina eong Nges, naarai Nges abu kogeu aminun eong." Ikeutu akaninikus kuju mama ejai Edeke kosodete ayoere nges kede itauonowok kere!

Ikoto isio airiamun nepepe ka yes kane tupuruc, isawan iuni ka atutubet, aduketait napena, kanu akou naka akirot naebe Edukone Ka Elakit. Mam ace.

Koyeoto nepepe.
Amina eong Nges,

Koye kwana atukos naepol na ekosio ngon! Kinga ngina toma owayai, oyeoto yesi da.
Naarai Nges abu kogeu aminun eong
Kosodi agwelun aitajarioka
Kokitoi loka Kalivari.

67 Aibo aponi kiswamaere ngin? Ko Kalivari? Kokitoi loka Kalivari. Kwape kiyeyo ngin bobo, akoto eong jo aijang akanin kae icetunganan yen ejai diekon, kotema ebe, "Isirereng Edeke jo, ekaloton."

Eong...(...?...)
Naarai Nges abu kogeu...
Kosodi agwelun aitajarioka
Ko...

Oo, mam tope yes iminasi Nges? [Kotemari atukos ebe, "Amen."-Ekewa.] Mam kereka Nges erai Loeumokina? ["Amen."] Ngesi erai angopisikon? ["Amen."] Erai Ngesi amoru kotoma akwap naitegakinit, angopis kotoma apak naka ekwam loelangir, angopis bon na ajeni eong. Kanuka ngun."

Eseseni aiyuunika kuju mama ijai Jo,
Ijo Imerekek yen ko Kalivari,
Edeke Eketajaran;
Kwana kiirarai eong kwape elipia eong,
Olema ileicika kere awai,
Karaun eong ameun lolo

Kere loKon!

Ekeutu akaniniwok kuju kwape kiyeo ekosio ngon.
Eseseni aiyuunika kuju mama ijai Jo,
Ijo Imerekek yen ko Kalivari,
Edeke Eketajaran;
Kwana kiirarai eong kwape elipia eong,
Olema ileicika kere awai,
Karaun eong ameun lolo
Kere loKon!

Ketuluroto awokokwes kwana kwape kiumuumor oni ekosio ngon.
Kwape etoritor eong toma orot loemutono ido loetiono loka aijar,
Kolukunite eong alangiru,
Koraun Jo Engarenikinitonika;
Ibelok amutonuka araun apaaran,
Omwata akiyo nuka aiturur awai,
Ido siri kijalak eong awolior awai
KosiepiKon.

Kwape kituluritotor yesi akwesikus, ekecokoniwok lominat, Onac Orman Neville, ebuni aitwar atukos.



www.messagehub.info

Nuelimonokinit

William Marrion Branham

"... toma apaarasia nuka eporoto..." Apuk. 10:7